


# *KISIKA YA KUSAMBILA*

## *YA NZAMBI ME SOLA*

 Beto bikala ya kutelama ntangu fyoti na yina beto ke kulumusa bayintu ya beto samu na kusambila. Mpe ntangu yayi, na bayintu ya beto ya kukulumusa, mpe mu ke na kivuvu ti bantima ya beto mpe, kele ya kukulumusa, mu ke na kumiyufula bantu yikwa na kati awa na nkokila yayi ke zola ti ba bambuka moyo na bawu na bisambu, samu na kima ya mfunu mingi? Beno ke zola kaka kutelemisa diboko ya beno, kutuba, “Nzambi, pesa munu na nkokila yayi yina mu ke na kusosa.” Mfumu kusakumuna beno.

<sup>2</sup> Tata ya beto ya Mazulu, na yina beto ntangu yayi me kukikumusa na kubelama na Kiti ya kimfumu yayi ya nene ya lemvo, na nzila ya lukwikilu, beto ke na kubelama na Bisika ya mazulu; kisika Nzambi, mpe Bawanzio, mpe ba-Chérubin, mpe basoda nyonso ya Mazulu kele ya kuvukana kintwadi. Samu ti Yandi tubaka ya lenda vwanda ve na ata nswini ke kubwa na ntoto kukondwa Tata ya Mazulu kuzaba yawu. Wapi mutindu ya kulutila Yandi zaba awa ntangu bankama ya bantu ke na bayintu ya bawu ya kukulumusa, mpe ke na kubokila na Nge samu na balombilu ya mfunu mingi. Tata, tala na yisi na yinza ya nsatu na nkokila yayi, samu ti beto kele bantu ya nsatu.

<sup>3</sup> Mpe mu ke sambila, Nzambi, ti samu ti beto me vukana awa mpe na kusamunaka na Nge lukwikilu ya beto na Nzambi ya moyo Yina ke pesaka mvutu na bisambu; beto me basika na kati-kati ya yinza ya me zengisa ve, na ntima mpe na makutu, beto me basika samu na kuzinga luzingu ya kukabuka, mpe samu na kuzinga na kundimaka lukwikilu ya beto na Nge. Na nkokila yayi beto me nangula maboko ya beto, mpe ke na kutuba, “Beto kele na nsatu.” Nzambi ya luzolo, pesa mvutu na mosi na mosi ya balombilu ya bawu.

<sup>4</sup> Mpe dyaka, Tata, beto ke sambila ti Nge kwisa kutala beto na nkokila yayi na kati ya Ndinga. Beto me kwiza awa samu na kuvwanda ya kusungika, samu na kubakula, ti beto zaba kaka yinki mutindu kuzinga na kilumbu ya bubu yayi; na yina beto ke tala na ntwala, yinki ya kusala. Samu ti, beto zaba ti Nkwizulu ya Mfumu ke na kubelama, landila bidimbu nyonso yina bapofete tubaka ntete. Beto ke na kubelamaka na ntangu, Mfumu, ntangu kukuula ya muvimba ke pesama na bana ya Nge. Nzambi, bika beto, mosi na mosi, kuvwanda kuna, Tata. Ti ya vwanda ve na mosi yina ke kondwa. Ya kele lukanu ya beto ya kuvwanda awa, Mfumu. Beto zola Nge, mpe beto ke na kumeka

na kuyilama samu na ngunga yango.

<sup>5</sup> Zonza na beto, beto ke lomba dyaka, na nkokila yayi. Mpe belusa bambevo. Bambevo mpe bantu nyonso ya mpasi yina kele na kati ya yinzo awa, beto ke sambila ti Nge ke belusa bawu, Mfumu; mpe mingi-mingi bayina na bansatu ya kimpeve. Beto ke sambila ti Nge ke vulusa konso moyo ya kuzimbana. Fulusa konso mukwikidi na Mpeve-Santu. Mpe vutula kikesa mpe Ngolo na kati ya bana ya Nge yina ke kwikila. Pesa bima yayi, Tata. Beto ke na kulomba mingi, samu ti Nge tubaka na beto na kulomba, “beno lomba ya kulutila, beno lomba bima ya nene, mingi ya yawu,” samu ti bakyese ya beto vwanda ya kufuluka. Mpe beto me lomba yawu na Nkumbu ya Yesu Klisto. Amen.

Beno lenda vwanda.

<sup>6</sup> Kieleka mu ke na kutanga yayi ntangu ya mbote-mbote ya nene na nkokila yayi, samu na kuvutuka awa na estrade dyaka, awa na école secondaire, samu na kutala bantu ya mbote yayi yina kele ya kuvukana samu na kuwa Nsangu ya mbote. Mu ke lomba kyadi ya Nzambi samu na kusadisa munu na kutuba na beno Kieleka na mutindu nyonso mu me zaba Kieleka. Yandi lenda dyaka kukanga yinwa ya muntu, mutindu Yandi lendaka kusala na yinwa ya nkosi. Mpe kana mu zola kumeka kutuba kima nyonso yina kele ya mbote ve mpe ya kuswaswana na luzolo ya Yandi, kisambu ya munu ya kieleka kele ti Yandi kanga yinwa ya munu, ti mu tuba yawu ve. Samu ti, ya kieleka, mu zola kuvwanda na Mazulu, munu mosi; mpe mu ke vwanda kuna ve, mpe, na balweka ya nyonso yina, mu ke vwanda ntwadisi ya luvunu, muntu yina me sala kima ya luvunu. Kana mu sala yawu, ya kele samu ti mu zaba ve ata luswaswanu. Mfumu sakumuna beno.

<sup>7</sup> Ntangu yayi, mbasi na suka, kana ya vwanda luzolo ya Nzambi, mu zola kuzonzila na dilongi, *Makwela Mpe Kufwa Makwela*. Mpe beto kele na kivuvu ti beno ke kwiza, mpe ke nata bilapi mpe ba-papié. Beto ke baka ntangu mingi ve, kasi mu ke zola kaka . . . Ya vwandaka lukanu ya munu ya kuvutuka awa, ntete, na Indiana, ti mu silaka beno yawu. Mpe mu ke meka, mbasi na suka. Kana mu baka yawu ve mbasi na suka, mu ke baka yawu mbasi na nkokila. Kasi mu ke meka mbasi na suka, kana Mfumu zola, na kuzonza na dilongi yango, balukolo nyonso zole ya mabanza. Mpe ti Nzambi sadisa beto na kuzaba yinki kele Kieleka, kaka samu na kuzaba yinki kele Kieleka, samu ti beto tambula na kati ya Kieleka mpe na kati Nsemo. Beto . . .

<sup>8</sup> beno zaba, mu vwanda vwanda na nkundi mosi ya kukula ya ndombi. Yandi tubaka na munu, yandi tubaka, “Mpangi Billy,” yandi tubaka, “Mu—mu zola kuzwa ata dyambu ve na nzadi.” Yandi tubaka, “Mu zola kuzwa tike ya munu na diboko. Mpe ntangu sifflet ke bula, mu zola ve kuzwa ata dyambu kuna. Mu

lombaka na Mfumu, ntangu mingi me luta, kana ya kele na kima ya yimbi, ti mu sungika yawu malu-malu yayi,” yandi tubaka, “samu ti ya ke vwanda mpimpa mpe mvula ya ngolo na suka yango ntangu bwatu ke kwenda na lweka yankaka yina.” Yandi tubaka, “Mu zola ve kima yina ke telemina. Mu zola kukeba na nyonso ya yawu na ntangu yayi.” Ya kele samu na yina beto kele awa, kumeka na kukeba na nyonso yina ke telemina, samu ti beto mata na ngunga yina.

<sup>9</sup> Ntangu yayi, mu ke baka ve ntangu mingi samu na kuzonzila beno na nkokila yayi, samu ti beto kele na balukutakanu zole mbasi. Mpe kuna mu ke kwenda na nswalu, kisika yankaka, na balukutakanu mingi, yankaka.

<sup>10</sup> Kasi, ntangu yayi, na Buku ya Deutéronome. Mu zola kutanga na kapu 16, banzila tatu ya ntete, ya Deutéronome 16:1 tii na 3.

*Tala ngonda ya Abib, mpe kembisa paki. . . MFUMU Nzambi ya nge: . . . na (ya yiya) ngonda ya Abib MFUMU Nzambi ya nge kubasisaka—kubasisaka nge na Égypte na mpimpa.*

*Nge ke pesa dikabu ya Paki na MFUMU Nzambi ya nge, ya dikabu ya mameme mpe ya ngombe, na kisika yina MFUMU me sola na kutula nkumbu ya yandi kuna.*

<sup>11</sup> Ntangu yayi, dilongi ya munu na nkokila yayi kele: *Kisika Ya Kusambila Ya Nzambi Me Sola.*

Kana beno tala, ngonda ya A-b-a-d. . . -b ya kele, ya zola kutuba, “Ngonda ya yiya.” Ngonda ya yiya kele ntangu ba basisaka bawu.

Mpe ntangu yayi kima ya ngitukulu kele ti beto na nkokila yayi, mutindu misambidi ya Nzambi, na kilumbu yayi yina beto ke na kuzinga, mpe beto ke tala mabanza mingi ya mutindu na mutindu ya bantu. Mpe ntangu nyonso yina ya kele na mabanza ya kuswaswana na zulu ya kima, ya kele na bakyuvu ya mutindu yankaka; ya fwana vwanda na mvutu mosi ya kieleka na konso kyuvu yina ba ke yufula.

Kana mu lendaka pesa kyuvu, “Yayi kele yinki?”

“Mbote,” ba ke tuba, “chaire.”

“Ya kele samu na yinki?” Beno me mona?

<sup>12</sup> Ntangu yayi, kuna, muntu lenda tuba, “Ya kele chaire ve. Ya kele dibaya.” Mbote, ya kele dibaya, kasi dyaka ya kele chaire. Beno me mona, ya fwana vwanda na mvutu ya kieleka samu na yawu.

Mpe kana mu lendaka pesa kyuvu na zulu ya kima, ya fwana vwanda na mvutu ya kieleka. Ya lenda vwanda kima pene na yawu; kasi ya fwana vwanda na kieleka, mvutu ya mbala mosi na konso kyuvu. Na yawu, kuna, kyuvu nyonso yina ke kwiza

na luzingu ya beto, ya fwana vwanda na mvutu ya kieleka, ya kusungama.

<sup>13</sup> Mpe ntangu yayi, bubu yayi, beto ke kuwa—kuwa ba ke tuba, kulutila bantu ya beto na yinza bubu yayi. . .

Na kuvwandaka missionnaire, yina me zyeta mingi lweka yankaka ya mubu mpe bisika nyonso na yinza, mu me kutana na bansambulu mingi ya mutindu na mutindu, mutindu Bouddha, mpe ba-Musulman, mpe ba-Sikhs, mpe ba-Djaïns, mpe yinki dyaka, ya bansambulu ya yinza. Mpe dyaka awa na États-Unis ya beto mosi; mpe bayinsi yankaka ya nzenza, me kutana na mutindu nyonso ya mabuundu ya beto, mutindu mabuundu ya beto ya ba-dénomination, kubanda na Katolika ya Rome ya katuka ntama, mpe dyaka ba-Grecque, mpe nyonso yankaka yina, mpe bakusambila ya mutindu na mutindu, mpe dyaka tii. . . bansungi nyonso ya ba-dénomination, ya bankama yivwa mpe kima ya mutindu na mutindu ya ba-dénomination ya ba-Protestant.

Ntangu yayi, mosi na mosi ya bawu, kieleka, beno lenda mona dibanza ya bawu, mpe mu lenda ve kusemba bawu. Mosi na mosi ke tuba ti ba kele kieleka, ba ke na kieleka. Mpe bantu yina kele ya mabuundu yango zolaka kwikila yawu, samu ti ba me vwandisa kisika ya bawu—ya bawu ya nsuka, kisika ya bawu ya nsuka ya Seko, na zulu ya malongi ya dibuundu yina. Mpe ba kele ya kuswaswana mingi, mosi na yankaka, tii ya ke sala bankama yivwa mpe kima ya mutindu na mutindu ya bakyuvu.

Na yawu, na kuvwandaka na bankama yivwa mpe kima ya mutindu na mutindu ya bakyuvu, ya fwana vwanda na Mvutu mosi ya kusungama. Mpe mu zola samu na beto na nkokila yayi, na kuvwandaka ti beto ke na kumeka na kukwenda na Mazulu, mpe kukutana Mfumu ya beto Yesu Yina beto nyonso zola, Mu ke zola kutala mbote na Masonuku samu na kumona yawu.

<sup>14</sup> Ntangu yayi, kana ya kele kyuvu ya Biblia, na yina ya zolaka kuzwa mvutu na Biblia. Ya zolaka katuka ve na nkonga ya bantu, kukatuka na kintwadi mosi na bampangi, to kukatuka na mulongisi mosi, to kukatuka na dénomination mosi. Ya zolaka katuka mbala mosi na Masonuku, kisika ya kukutana ya Nzambi kele, ya kusambila. Mpe kielekaka, na kuvwandaka Nzambi, ya kele na kisika ya kukutana kisika mosi, yina Yandi ke kutanaka.

<sup>15</sup> Ntangu yayi, beto ke tala awa ti na Deutéronome awa, na mbandukulu, Moïse ke na kuvutukila Masonuku, bima yina yandi vwanda tuba na bawu, mutindu Yandi kubasisaka bawu na diboko ya nene, ya ngolo, na ngaanda ya Égypte, mpe na ntete me tula bawu.

Ba vwanda bokila bawu “bantu ya Nzambi” tii ba basikaka na Égypte, mpe kuna ba vwanda bokila bawu “dibuundu ya Nzambi.” Samu ti, dibuundu kele kuvukana, to, kieleka, *dibuundu* zola kutuba “bayina ba me bokila na kubasika,”

bayina ba me bokila na kubasika. Mpe ba basikaka na Égypte, na lutumu ya kuvwanda dibuundu.

<sup>16</sup> Ntangu yayi Nzambi me tuba na bawu, ntangu bawu . . . ntete ba tula tempelo mpe nyonso yina ba salaka, “Mu ke sola kisika ya Munu ya kusambila, mpe Mu ke tula Nkumbu ya Munu na kati ya yawu.” Mpe ya kele kisika kaka yina Nzambi lendaka kutana na muntu nyonso, ya vwandaka na nzila ya kusola ya Yandi mosi. Yandi solaka kisika ya Yandi, mpe kisika Yandi ke sola kisika ya Yandi, Yandi ke tula Nkumbu ya yandi, nzila ya zole awa ke tuba na beto ti; Yandi lenda tula Nkumbu ya Yandi na kisika yina Yandi me sola samu ti bantu kusambila Yandi. Ntangu yayi, kima ya yawu kele ti, beto zola kutala wapi kisika kele kisika yango.

<sup>17</sup> Na bankama yivwa mpe kima ya mutindu na mutindu ya mabanza, na kutulaka na lweka mikwikidi nyonso ya nsambulu ya mimpani, mpe ke na kuzonzaka kaka nsambulu ya Muklisto. Na kutala, mu ke zola nsambulu, to kieleka mu ke zola ve kukwenda kuna mpe kuzonza na bawu. Kasi, ba kele na foti. Buklisto kele nsambulu kaka yina kele kieleka, ya kele Buklisto. Mpe kieleka mu ke na kutuba yawu ve samu ti mu kele Muklisto; samu ti, mu ke kwikila yawu kuvwanda Kieleka. Ya kele nsambulu kaka yina kele ya kulunga.

<sup>18</sup> Mu vwandaka na ndyamu kisika ba ke sobaka mpunda ya mpembe konso bangunga yiya. Kisika, Mahomet, nganza-Nzambi ya nene mpe—mpe ntwadisi kaka na manima ya Klisto, ba ke tuba ti yandi kele profete, mpe, mu ke sala ntembe ve kasi yina yandi vwandaka, kaka na manima ya bampangi ba-Maccabées. Kasi ntangu ba . . . Yandi kufwaka. Yandi tubaka ti yandi ke vumbuka dyaka mpe ke nunga yinza ya muvimba. Ntangu yayi, pene ya konso bangunga yiya ba ke sobaka mikengi, mpe ba ke bikaka mpunda ya mpembe na ntoni ya yandi. Ba ke, samu na mafunda ya bamvula zole, ke vingila yandi kuvumbuka dyaka mpe kununga yinza. Kasi beno me mona . . .

<sup>19</sup> Mpe beno kwenda na Bouddha; Bouddha zingaka bankama mingi ya bamvula, pene-pene ya bankama makumi zole na tatu ya bamvula me luta, nzambi ya—ya Japan. Mpe na yawu yandi vwandaka philosophe, kima mutindu Confucius, mpe nyonso yankaka yina.

Kasi nyonso yayi, samu . . . bantu ke salaka, mpe nyonso yankaka yina, bawu nyonso kufwaka na philosophie ya bawu, mpe kele ya kuzika mpe na kati ya ntoni.

Kasi Buklisto, yina kele ya kutula na Yesu Klisto, ya kele na ndyamu ya mpamba. Yandi vwandaka Muntu yina kaka telamaka ntete na ntoto, mpe zingaka mpe tubaka, “Mu ke na kiyeka ya kupesa luzingu ya Munu mpe kuvumbula dyaka yawu.” Mpe Yandi salaka yawu. Mpe Yandi ke zinga bubu yayi.

Mpe beto zaba ti Yandi ke zinga, samu ti Yandi kele na beto mpe ke lakisaka Yandi mosi na nzila ya bidimbu ya nzutu mpe mambu ya ngitukulu, ti Yandi silaka ti Yandi ke sala samu na kulakisa yawu. Na kutala, ti Dikunzi ya Tiya yina twadisaka bana ya Israël na ntoto ya kuyuma, Yandi kele na beto bubu yayi, mpe me bika ti ba baka Yandi foto; na kusalaka bidimbu mpe mambu ya ngitukulu yina Yandi silaka ti Yandi ke sala na kilumbu yayi, na kumonaka Bandinga nyonso yina Yandi silaka kusalama kilumbu yayi. Na yawu, bayankaka ya yinza ya mimpani kele na ngaanda. Ya kele Buklisto!

<sup>20</sup> Ntangu yayi, na kuvwandaka ti ya kele na bankama yivwa mpe kima ya bakyuvu na zulu ya kisika Nzambi ke kutanaka, “Yandi ke kukutanaka na ba-Méthodiste, to Yandi ke kukutanaka na ba-Baptiste, mpe ti Yandi ke kukutanaka na *yayi*, mpe *yina*, mpe *yina yankaka*.” Ntangu yayi, ya kele na kyuvu kuna, na yawu muntu nyonso fwana kusosa mpulusu ya yandi mosi na boma mpe kutekita.

Kasi na nkokila yayi mu zola kumeka na kumona, mpe kulakisa na Masonuku, kisika ya kulunga kele kisika Nzambi ke kutanaka mpe ke sambilaka na bantu. Mpe, kana ya kele yina, yina kele kisika kaka Yandi ke kutana.

<sup>21</sup> Ntangu yayi, beto me baka dilongi yayi na Deutéronome. Ya kele mpova ya Grec yina ke na bansasa ya kuvukisa, to, ya zola kutuba, “misiku zole.” Mpova ya Grec, *Deutéronome*, zola kutuba “misiku zole ya luswaswanu.”

Mpe ya kele kaka yina Nzambi ke na yawu, misiku zole ya luswaswanu. Mpe mosi ya yawu kele musiku ya lufwa, mpe mosi yankaka kele musiku ya Luzingu. Nzambi ke na misiku zole. Kulanda Yandi, mpe kusadila Yandi mpe kusambila Yandi, kele Luzingu; kumanga Yawu kele lufwa. Ya kele na misiku zole na Nzambi.

<sup>22</sup> Ntangu yayi, mosi ya misiku yango vwandaka ya kuza- . . . kuzabanaka na yinza, na Mongo ya Sinai. Nzambi pesaka musiku na Moïse mpe Israël. Ve ti musiku sadisaka bawu, kasi musiku lakisaka kaka bawu ti bawu vwandaka misumuki. Tii ntangu yina, ba zabaka ve yinki disumu kuvwandaka, tii ba kuzwaka musiku. Ya lenda vwanza ve na musiku kukondwa kitumbu. Musiku kele musiku ve, kukondwa kitumbu. Na yawu, kuna, “Kuzitisa ve musiku kele disumu, mpe difuti ya disumu kele lufwa.” Na yawu kuna, tii Nzambi salaka bawu musiku, ya vwandaka ve na kuzitisa ve musiku yina ba tangilaka bawu.

Kana ya kele ve na musiku awa yina ke tuba ti beno lenda ve kunata ditoma bakilometele makumi tatu na zole mbangu na ngunga mosi, na yina beno lenda nata ditoma bakilometele makumi tatu na zole mbangu na ngunga mosi. Kasi ntangu ya kele na musiku ke tuba beno lenda ve kusala yawu, na yina ya kele na musiku mpe kitumbu na manima ya yawu.

<sup>23</sup> Ntangu yayi, lufwa, musiku ya lufwa, vwandaka misiku yina kupesamaka na Mongo ya Sinai, yina tubaka na muntu ti yandi vwandaka musumuki. Mpe, na kuzitisaka ve musiku ya Nzambi, yandi kufwaka. Kasi ya kele ve na mpulusu na kati ya musiku. . . . Ya vwandaka kaka na pulusu yina zolaka tula beno na boloko; ya vwandaka na kima ve samu na kubasisa beno.

Kasi na manima Yandi pesaka musiku yankaka, yina vwandaka na Mongo ya Calvaire, kisika disumu kutulamaka na Yesu Klisto, mpe kuna kitumbu kufutamaka. Mpe ve na . . . Kukondwa musiku, “kasi na nzila ya lemvo beno kele ya kuvulusa,” na nzila ya lemvo ya Nzambi, na nzila ya predestination na yina Nzambi kuzabaka beno na ntwala.

<sup>24</sup> Ntangu yayi beto ke mona misiku nyonso zole yayi, Deutéronome, ke na kuzonzila na misiku zole. Ya vwandaka na misiku zole. Mosi vwandaka musiku ya lufwa, mpe mosi yankaka musiku ya Luzingu.

<sup>25</sup> Ya vwandaka mpe na bangwisani zole yina ba pesaka na bantu. Beto ke zonzila na yawu mbasi na suka.

Mosi ya yawu kupesamaka na Adam na kima na zulu, “kana nge sala *yayi* mpe kusala ve *yina*,” kasi ba zitisaka ve musiku yango. Adam, Ève kuzitisaka yawu ve, na nsaba ya Èden.

Na yina Nzambi salaka ngwisani ya zole, mpe pesaka yawu na Abraham, mpe musiku yina vwandaka ve na kana yandi lenda ve. “Ya kele ve yina beno me sala to yina beno ke sala;” Yandi tubaka, “Mu me sala yawu yimeni.” Yina kele lemvo. Yina kele musiku ya Luzingu. Nzambi salaka yawu samu na Abraham mpe Nkuna ya yandi na manima ya yandi, ya kele, Nkuna nyonso ya Abraham.

Mutindu Biblia me tuba, “Israël nyonso ke vulusa,” kasi yina zola kutuba ve ba-Juif. Mutindu Paul tubaka, “Israël yina kele na kati, to Israël yina kele na ngaanda.” “Na ngaanda,” mutindu beto zonzaka nkokila yankaka yina, ya vwandaka bana ya Isaac, na nzila ya kuvukisa banzutu. Kasi musiku ya Nzambi vwandaka na nzila ya Klisto, yina vwandaka Nkuna ya Ntinu ya Abraham, yina, “na nzila ya lemvo Israël nyonso kele ya kuvulusa.” Ya kele, “Nyonso yina kele na kati ya Klisto kele ya kuvuluka,” nyonso, ngwisani ya zole ya Nzambi. Kasi bima nyonso yayi vwandaka tubila na ntwala Klisto.

<sup>26</sup> Ntangu yayi beno tala nzila ya nzole. Nzila ya zole awa na Deutéronome 16, “Kusambila na kisika yina Mu me sola.” Ntangu yayi beno fwana kusambila Nzambi, Yandi tubaka, “Na kisika yina Mu me sola,” ve yina muntu yankaka me sola, kasi, “yina Mu me sola.”

Ntangu yayi, kana Nzambi solaka kisika, ya kele kuna samu na ndandu ya beto ya mbote na kutala yina Yandi tubaka na zulu

ya yawu. Mpe wapi kisika ya kele? Mu zola kutala yawu, samu ti, na kieleka, mu zola kusambila Yandi.

Beto nyonso kele awa, na nkokila yayi, samu na kusambila Yandi. Beto kele ya kuvwanda awa na nkokila yayi, ba-Méthodiste, ba-Baptiste, ba-Catholique, Bambangi ya Yehowa, Baklisto ya Science, mpe nyonso, kasi beto ke na kusosa kima mosi.

Beto zola kuzaba Kieleka. Biblia ke tuba, “Beno ke zaba Kieleka, mpe Kieleka ke pesa beno kimpwanza.”

Muntu, beno lenda zaba ve yina beno ke na kusala, beno zaba ve mutindu ya kusala yawu tii beno ke zaba mutindu ya kusala yawu; beno zaba ve yinki ya kusala tii beno ke zaba mutindu ya kusala yawu, na kisika. Beno fwana zaba yina beno ke na kusalaka mpe mutindu ya kusala yawu.

<sup>27</sup> Yayi ke lakisa beto ti Nzambi ke na kisika ya kukutana samu na misambidi ya Yandi, na kisika mosi. Na kisika yango, kaka, Nzambi ke kutanaka na misambidi ya Yandi.

<sup>28</sup> Ntangu yayi, mpe, kisika yina Yandi, me sola samu na misambidi ya Yandi, Yandi me tuba ti Yandi ke tula Nkumbu ya Yandi. Ntangu yayi beto tala mbote mpe beto mona, na nzila ya Masonuku, kisika kisika yayi kele. Kieleka, kana Nzambi me tuba ti Yandi ke tula Nkumbu ya Yandi na kisika yayi kisika Yandi me sola na kukutana bantu mpe kusambila na bawu . . . to na kisika, bawu kusambila Yandi, ti ya kele kisika mosi na kati ya Biblia, samu ti ya vwandaka samu na bansungi nyonso.

<sup>29</sup> Mpe Nzambi ya nene yina ke sobaka ve lenda soba ve. Muntu ke sobaka. Kasi beno lenda tula luzingu ya beno na zulu ya kima nyonso yina Nzambi tubaka ntete na konso ntangu, samu ti ya kele Kieleka. Ya kele Kieleka. Samu ti, ya kele kima kaka yina mu lenda kutula ntima, ya kele Biblia. Samu ti, ndinga ya muntu ke kondwa, kasi Nzambi kele na zulu ya nyonso.

Mvula yayi mu fwana zaba mingi kulutula na yina mu zabaka mvula me luta. Beno fwana, mpe, konso kilumbu. Beto kele ya kusuka, na yawu beto ke landila na luzabu.

Kasi Nzambi kele ya seko. Yandi kele ya seko. Mpe, na kuvwandaka ya seko, Yandi lenda ve kukwenda na ntuala na luzabu. Yandi kele ya kulunga, na kubanda. Konso lukanu fwana vwanda kaka kieleka.

<sup>30</sup> Mpe mutindu Nzambi salaka kilumbu mosi, Yandi fwana ntangu nyonso kusala mutindu yina, to Yandi salaka yimbi ntangu Yandi salaka mbala ya ntete. Kana muntu me kwiza ntete na Nzambi samu na mpulusu, na zulu ya lufulu yina Yandi ndimaka yandi, ya fwana kundimama na lufulu kaka mosi yina konso ntangu. Ya kele kieleka. Kana muntu kwiza ntete na Nzambi samu na kubeluka ya Kinzambi, mpe ti Nzambi kundimaka yandi na zulu ya lufulu mosi, muntu yankaka yina ke



kwiza, Yandi fwana ndima yandi mutindu mosi, to Yandi salaka yimbi ntangu Yandi ndimaka muntu ya ntete. Nzambi salaka lufulu na zulu ya yina Yandi ke kutana muntu. Yandi salaka lufulu yina Yandi ke sala, mutindu Yandi ke sala yawu, mpe ya vwandaka na nzila ya menga ya kupesa munkayulu ya mwana ya dimeme na nsaba ya Eden. Nzambi ata mbala mosi ve, na kilumbu mosi, me sobaka ntete yawu.

<sup>31</sup> Yandi kanaka mutindu Yandi ke vulussa muntu. Beto me meka bubu yayi na kulonga muntu na yawu; beto me meka na kulongisa bawu na lukolo, me meka na kulonga bawu, me meka na kusala dénomination, me meka na kusala mitindu nyonso yayi ya bima; na kukotisa bawu, na kuningisa bawu na kati, na kubotika bawu na kati, mutindu nyonso yankaka ya kele, kukotisa bawu na nzila ya mikanda. Kasi ke landila kaka, mutindu mosi, Nzambi ke kutana na muntu na yisi ya Menga yina kubwaka ya Mwana-dimeme. Menga vwandaka mutindu ya Nzambi na mbandukulu, mpe Menga kele mutindu ya Nzambi na nkokila yayi. Ya kele mbote na kusala na kumanga na kudya mpe kunwa mpe bima nyonso yayi, kasi mpulusu ke kwizaka kaka na nzila ya Menga. Menga kele kaka mutindu yina Nzambi me sola samu na kuvulusa muntu, mpe Yandi lenda ve kusoba yawu.

<sup>32</sup> Job kuzwaka kima mutindu mosi. Yandi zabaka ti yandi vwandaka ya kusungama, samu ti yandi pesaka munkayulu yina Nzambi lombaka na yandi.

<sup>33</sup> Ntangu yayi, beto sosa ntangu yayi samu na kumona yinki kele kisika yayi, mpe kisika yina Yandi ke tula Nkumbu ya Yandi. Beto ke tala na kuzwa kisika Yandi tulaka Nkumbu ya Yandi. Kuna, kana beto tala yinki kele Nkumbu ya Nzambi mpe kisika Yandi me tula Yawu, kuna beto me kuzwa kisika ya kusambila ntangu beto ke mona yawu.

Bima nyonso yayi, kieleka, ya vwandaka bivudi ya bima ke na kwiza. Musiku nyonso vwandaka tubila na ntwala bima ke kwiza.

<sup>34</sup> Kaka mutindu, ngonda kele kivudi ya mwini. Ya ke sadilaka na ntangu mwini kele ve, kaka mutindu Dibuundu ke sadila na ntangu M-w-a-n-a ya Nzambi kele ve. Na ntangu Mwana kele ve, Nsemo ya fyoti, Dibuundu, mikwikidi, ke sadilaka Nzambi mpe ke pesa Nsemo na ntangu Mwana vwandaka ntama. Kasi ntangu mwini ke basisa, beno ke mona dyaka ve ngonda, samu ti yawu me kota. Ya kele dyaka ve na nsatu ya nsemo ya yandi, samu ti ya ke bakaka kaka nsemo ya yandi na manima, na mwini. Ntangu yayi, mutindu bakala mpe kento, mwini mpe ngonda kele, Dibuundu mpe Klisto.

<sup>35</sup> Ntangu yayi beto ke mona, ti, bima yayi vwandaka kivudi ya Klisto. Konso munkayulu, feti, mpe nyonso na kati ya Ngwisani ya Ntama, tubaka na ntwala Klisto; kaka mutindu kivudi ke talanaka na ntoto. Ntangu yayi awa kele kisika beto ke tala na

kuzwa kisika ya kulunga ya kusambila, ya kele kuvutuka awa na Ngwisani ya Ntama kisika ya kupesamaka mpe kumona yinki bima yayi vwandaka.

<sup>36</sup> Ntangu yayi, ntangu kivudi ke talana na ntoto, beno lenda to ve kutuba kana ya kele bakala, kento, to niama, to nyonso yina ya lendaka vwanda, samu ti ya ke sala kivudi na zulu ya ntoto. Mpe na yina kivudi yango ke kuma nkufi, kivudi na kuvwandaka negatif; mpe ya lendaka vwanda ve negatif, kukondwa positif. Na yawu, ntangu yina kele ya positif ke belama na yina ya negatif, yina kele negatif ke minama na kati ya yina kele positif. Kivudi mpe—mpe positif ke kwiza kintwadi, mpe ya kele yina ke sala yawu kuna positif.

Mpe kana “bima nyonso ya ntama,” Biblia tubaka, “na Ngwisani ya Ntama, vwandaka bivudi ya bima ke kwiza,” na yina kuna Klisto vwandaka kivudi ya bima ke kwiza.

<sup>37</sup> Na yawu beto lenda mona, na nzila ya Ngwisani ya Ntama bifwanukusu, kisika Yandi solaka na kutula Nkumbu ya Yandi, mpe na . . . samu na ntangu yayi. Ntangu yayi, mutindu kivudi kele . . . ke talana na yisi, mu ke tuba, ya kele negatif, yina kele kifwanisu, na yawu beto, misambidi, mpe lenda mona bivudi ya Ngwisani ya Ntama kumwangana na kati ya positif ya Malu-malu.

<sup>38</sup> Ntangu yayi, bafeti nyonso, bakonze, tabernacle nyonso, yinti nyonso, nyonso na kati ya tabernacle, nyonso fwanikisaka Klisto. Minkayulu nyonso, misiku nyonso, nyonso vwandaka kifwanisu ya Klisto. Beto me talaka yawu, mbala na mbala, awa na tabernacle.

Kuna beto ke mona, na nzila ya yayi, ti konso credo, dibuundu, mpe dénomination me bikana ntama mingi na manima. Ya kele dyaka ata fyoti ve, na kati ya kutesa ya kukima mbangu. Konso credo, konso dibuundu, konso dénomination, kele ya muvimba ya kubasika. Ya kele na ata kisika ve samu na bawu ata fyoti ve.

<sup>39</sup> Kima ve kele ya kufwanikisa na Ngwisani ya Ntama, to kisika mosi na kati ya Biblia, samu na dibuundu, kasi ngolo ya kuvukana ya yinzo ya yinda ya Babel. Ya kele kaka kima yina me fwanikisa kuvukana. Samu ti, ya vwandaka na nzila ya Nimrod, muntu ya yimbi yina kwendaka mpe lombaka na ngolo mwa bayinsi nyonso na kuvukana na kisika mosi mpe na yinzo ya yinda ya nene yayi. Ya vwandaka kusambila landila kinzambi, kieleka, kasi na kutalaka ve na Ndinga ya Nzambi. Na yawu ya kele kisika beno ke mona kifwanukusu ya nsambulu ya ba-dénomination, yinzo ya yinda ya Babel, na Ngwisani ya Ntama. Yina, nsambulu yayi kieleka vwandaka nsambulu, kasi ve nsambulu ya Ndinga ya Nzambi.

<sup>40</sup> Nzambi me sola ve na kutula Nkumbu ya Yandi na kati ya dénomination mosi. Mu zola Masonuku samu na yawu, kana ya

kele. Mu zaba ti ba ke banza ti Yandi salaka yawu, kasi Yandi salaka yawu ve. Yandi lenda ve kutula Nkumbu ya Yandi na bisika mingi, samu ti Yandi tubaka Yandi tulaka Nkumbu ya Yandi na kisika mosi. Mpe, kisika mosi yango, mosi na yankaka ya ba-dénomination ya beto zola kutuba ti ba kele kisika yango, kasi ya kele ya kuswaswana.

Kasi wapi kisika Yandi me tula Nkumbu ya Yandi?

<sup>41</sup> Ntangu yayi, mpe, Yandi, yinki kele Nkumbu ya Yandi, ntete? Beto fwana (Nkumbu) mona yina Nkumbu ya Nzambi kele ntete beto tala yinki ya kele Yandi ke tula na kisika yango.

Ntangu yayi, beto ke tala ti Yandi kuzwaka bankumbu mingi. Yandi kele ya kubokila. . . Yandi vwandaka ya kubokila “Tata,” yina kele kisalu. Mpe Yandi vwandaka ya kubokila “Mwana,” yina kele kisalu. Yandi vwandaka ya kubokila “Mpeve-Santu,” yina kele kisalu. Yandi vwandaka ya kubokila “Rose ya Sharon,” yina vwandaka kisalu. “Lis ya Vallée,” kisalu, “Mbwetete ya Suka.” “Yehowa-Jiré, Yehowa-rapha,” bisalu sambwadi ya mutindu na mutindu, ya kuvukana, bankumbu ya redemption, mpe nyonso ya bawu kele bisalu. Ata mosi ya bawu vwandaka bankumba.

Kasi Yandi kele na Nkumbu.

<sup>42</sup> Ntangu Yandi kutanaka na Moïse, Yandi vwandaka ntete ve na Nkumbu, mpe Yandi tubaka na Moïse, “MU KELE YINA KELE.” Mpe ntangu beto ke mona Yesu na zulu ya ntoto, kuzonza na Hébreux kapu ya 6. . . Mu ke lomba beno lemvo, Santu Jean kapu ya 6. Yandi tubaka, “MU KELE YINA KELE.”

Ba tubaka, “Oh, Nge kele Muntu yina me luta ve bamvula makumi tanu, mpe ke tuba ti Nge ‘monaka Abraham?’”

<sup>43</sup> Yandi tubaka, “Ntete Abraham kuvwanda, MU KELE.” Mpe “MU KELE” Yina vwandaka, na divunda ya tiya, Dikunzi ya Tiya yina vwandaka na kati ya divunda ya tiya kuna na bilumbu ya Moïse, “MU KELE YINA KELE.”

<sup>44</sup> Mpe ntangu yayi beto ke mona ti Yesu tubaka, mpe, “Mu me kwiza na Nkumbu ya Tata ya Munu, mpe beno me yamba Munu ve.” Na yina, Nkumbu ya Tata fwana vwanza Yesu. Ya kele kieleka. Nkumbu ya Tata kele Yesu, samu ti Yesu tubaka yawu. “Mu ke na Nkumbu ya Tata ya Munu. Mu me kwiza na Nkumbu ya Tata ya Munu, mpe beno me yamba Munu ve.” Na yina, Nkumbu ya Yandi vwandaka Yesu.

Mpe Gabriel bokilaka Yandi Yesu, bapofete bokilaka Yandi Yesu, mpe Yandi vwandaka na nyonso Yesu. Na ntwala ya mbutukulu ya Yandi, mpe profete ya santu kubokilaka Nkumbu ya Yandi *Emmanuel*, yina kele, “Nzambi na beto.” Na yina, “Nzambi kumonisamaka na nzutu, samu na kukatula disumu ya yinza,” mpe, na kusalaka mutindu yina, ba pesaka Yandi Nkumbu ya Yesu. Na yawu, Yesu kele Nkumbu.

Mpe Nkumbu vwandaka ya kutula na kati ya Muntu; na dibuundu ve, na dénomination ve, na credo ve, kasi na Muntu! Yandi solaka na kutula Nkumbu ya Yandi na kati ya Yesu Klisto. Ntangu yayi beto ke mona ti kuna Yandi me kuma kisika ya kusambila ya Nzambi, kisika beno ke sambila Yandi.

<sup>45</sup> Ntete ntete Yandi kubutama kwandi, Nkumbu ya Yandi vwandaka Yesu. Ya vwandaka mfunu mingi, ya pesamaka na mama ya Yandi na Wanzio Gabriel, ti Nkumbu ya Yandi ke vwanda “Yesu, Mwana ya Nzambi,” yina Yandi vwandaka.

<sup>46</sup> Kuna beto me kuzwa yawu, kuna. Yayi kele yawu, kaka. Ya kele, samu na Yandi kaka, Kisika ya kusambila yina Nzambi me sola. Kisika Nzambi, me sola. Nzambi me sola na kukutana muntu; ya vwandaka ve na dibuundu mosi, na credo mosi ve, kasi na kati ya Klisto. Ya kele kisika kaka yina Nzambi ke kutana na muntu, mpe yandi lenda sambila Nzambi, ya kele na kati ya Klisto. Kisika kele kaka yina. Ata kana beno kele Méthodiste, Baptiste, muntu ya Katolika, Protestant, nyonso yina beno lendaka vwanda, ya kele kaka na kisika mosi yina beno lenda sambila Nzambi mbote, ya kele na kati ya Klisto.

Romains 8:1, ke tuba, “Na yawu ya kele ve na ntangu yayi na kitumbu na bayina kele na kati ya Klisto Yesu, bayina ke tambulaka ve na kulandaka nzutu, kasi ke landaka Mpeve.” Yina kele Nsangu ya mbote.

<sup>47</sup> Beto lenda vwanda ya kuswaswana na zulu ya ba-credo. Beto lenda vwanda ya kuswaswana na zulu ya mabanza yina muntu me sala. Beno lenda kwenda na dibuundu ya ba-Méthodiste, beno fwana vwanda Méthodiste; Baptiste, Baptiste; Katolika, Katolika. Kasi ntangu beno ke botama na kati ya Klisto, mpe kukuma kinama ya Nzutu ya Yandi, ya kele na ata luswaswanu ve. Bibaka ya kukabuka ke kubwa mpe beno me kuzwa kimpwanza, samu ti beno kele na kati ya Klisto Yesu. Mpe beno ke sambila Nzambi na Kimpeve mpe na Kieleka ntangu beno kele na kati ya Klisto Yesu. Ya kele dikani ya Nzambi samu na beno na kusambila Yandi na kati ya Klisto Yesu.

<sup>48</sup> Ntangu yayi, ata dibuundu ya dénomination lenda tuba yayi, ata mosi ve lenda tuba yawu. Wapi mutindu beno lenda tuba mutindu? Na kusala kima mutindu yina ke vwanda mpeve ya mbeni ya Klisto, kuvwanda ya kukatuka na Klisto; kukatuka na Yandi. Beno lenda ve kusala yawu. Klisto kele kisika kaka yina Nzambi ke kutana na misambidi.

<sup>49</sup> Ba ke tubaka, bubu yayi. Mu kuzwaka bantu kutuba na munu. Bakala mosi bokilaka munu ntama mingi ve, na Beaumont, na Texas. Yandi tubaka, “Tata Branham, kana nkumbu ya nge kele ve na buku ya dibuundu ya beto, nge lenda ve kukwenda na Mazulu.” Beno lenda kwandi kubanza na yawu? Beno kwikila ve na kima ya mutindu yina. Ba ke banza ti beno fwana vwanda ya dibuundu mosi yina to beno lenda ve

kukwenda na Mazulu. Ya kele luvunu. Na kukwikila yawu, ya kele mbeni ya Klisto. Mu ke tuba yayi: Kana beno kwikila na mpeve ya mutindu yina, beno me zimbana. yina kele kidimbu ya mbote ti beno me zimbana, samu ti ya ke na kukatula na yina Nzambi salaka. Nzambi na ata mbala mosi tulaka Nkumbu ya Yandi na dibuundu mosi. Yandi tulaka Yawu na kati ya Mwana ya Yandi, Klisto Yesu, ntangu Yandi mpe Mwana ya Yandi kumaka Mosi. Yina kele kisika ya kusambila ya kieleka. Ba tulaka ata lufulu yankaka ve, ata ditadi yankaka.

Na Klisto, Ditadi ya ngolo, mu me telama;  
Bisika yankaka nionso kele putulu.

Ba-dénomination ke na kupanzana mpe ke na kubwa, bayinsi ke luta, kasi Yandi ke vwanda kukondwa nsuka. Ata kisika yankaka ve yina muntu lenda kuzwa, samu na kusambila Nzambi, yina Nzambi ke pesa mvutu na yandi, ata kisika mosi ve kasi na kati ya Klisto Yesu. Kaka kisika yina kele, kisika kaka yina Nzambi me sola samu na kutula Nkumbu ya Yandi, mpe kisika kaka yina Yandi ke kutana muntu, samu na kusambila. Beno kele ya kuzimbana, na kukwikila na kima yankaka.

<sup>50</sup> Beno tala, bafeti nyonso sambwadi ya ba-Juif vwandaka salama na kisika mosi. Ata mbala mosi ve ti bawu salaka feti mosi *awa* samu na ba-Méthodiste, mpe mosi na lweka *awa* samu na ba-Baptiste, mosi na lweka *kuna* samu na ba-Presbytérien, mosi na manima *awa* samu na Katolika, mpe mosi samu na Misyoni. Bafeti nyonso sambwadi vwanda salamaka na kisika mosi.

<sup>51</sup> Ya kele kifwanisu ya kitoko awa. Beto vwandaka me tala kaka Bansungi Sambwadi ya Dibuundu, na kulakisa ti Nzambi bumbaka Bansungi nyonso Sambwadi ya Dibuundu na kati ya Ndinga, samu ti konso nsungi ya dibuundu basisaka kitini ya Ndinga, mpe ntangu nyonso yina ba basisaka yawu mpe ba monaka Nsemo.

Kaka mutindu bantu yina bakulaka na ntete mbotika na Nkumbu ya Yesu. Yinki ba salaka? Ba salaka dénomination na ngaanda ya yawu, mpe ya kufwaka kaka kuna. Na yina Nzambi na mbala mosi me luta na muntu yankaka. Yandi ke vwanda ve na mosi ya ba-credo mpe ba-dogme yina. Yandi ke na kima ve ya kusala na yawu. Ya kele na kima ve ya kubeba na Nzambi. Ndinga ya Nzambi kele santu, kukondwa kuvukisa. Klisto kele kisika ya kati-kati ya kusambila ya Nzambi. Yandi kele Nzambi.

<sup>52</sup> Bafeti nyonso sambwadi fwana salama na kisika yayi mosi. Beno zolaka sala ve feti na kisika mosi yankaka. Kasi bawu nyonso sambwadi, kisika . . . Bafeti sambwadi ya mvula fwana kusalama na kisika mosi. Na yawu, Bansungi Sambwadi ya Dibuundu zolaka katuka na kisika mosi, yina vwandaka Klisto yina ke na kuzonza na Bansungi Sambwadi ya Dibuundu. Ya

kele kaka kieleka. Kifwanukusu, ya Bansungi Sambwadi ya Dibuuundu, kasi ba salaka ba-dénomination na yawu.

<sup>53</sup> Ntangu yayi beto tala na kifwanukusu yankaka na yina beto dyaka awa, ya kele, kifwanisu ya paki, ya tubilaka na ntwala Yesu. Beto ke tala awa munkayulu ya menga, na nzila ya lufwa. Munkayulu ya menga vwandaka kisika yina tubilaka na ntwala Klisto. Dénomination lenda basisa menga; beno lenda banza na dibuuundu ke basisa menga, kubasisa menga ya dénomination? Kieleka ve. Ya bakaka menga, kubasisa menga ya luzingu. Mpe, luzingu, awa Yesu me talana na mwana ya dimeme. Mwana ya dimeme vwandaka kifwanukusu ya Klisto, mpe tubilaka na ntwala Klisto, samu ti Yandi vwandaka “Mwana ya dimeme ya Nzambi,” yina Jean kotisaka, “yina ke katula disumu ya yinza.” Beto ke tala Yesu kotalana, awa na Exode kapu 12.

<sup>54</sup> Beno tala, ya vwandaka kaka kisika yina lufwa zolaka bula ve. Ntangu lufwa zolaka bula na yinsi, ya zolaka vwanda na kisika mosi; bayina nyonso vwandaka na yisi ya yayi vwanda kufwa. Kaka kisika mosi! Ntangu yayi, ya zolaka tuba ve ti ya vwandaka na yinzo mosi; kasi ya vwandaka na kisika mosi, ya kele kisika mwana dimeme vwanda kufwa. Kisika menga ya mwana dimeme vwandaka, wanzio ya lufwa zolaka bula ve, samu ti ya vwandaka kisika mosi Nzambi tulaka Nkumbu ya Yandi. Mpe mwana dimeme yango vwandaka na nkumbu na bilumbu ya ntama kuna na mbandukulu, mwana ya dimeme. Beno tala, ya vwandaka kisika mosi yina yandi zolaka bula ve.

<sup>55</sup> Mpe ntangu yayi ya kele mutindu mosi bubu yayi. Ya kele kaka na kisika mosi yina lufwa ya kimpeve lenda ve kubula, ya kele na Ndinga. Lufwa lenda ve kubula Ndinga, samu ti Yawu kele Ndinga ya Nzambi ya moyo.

Kasi ntangu beno ke tula ba-credo na Yawu, Ndinga ke basika Yandi mosi. ya ke kabuka mutindu maza na mafuta. Beno lenda ve kuvukisa yawu kintwadi. Na yawu, beno me mona, ntangu credo ke kota na dénomination, bawu nyonso ke kwenda na manima ya credo; mpe Ndinga ke kufwa, mpe ke landila na muntu yankaka mpe ke bwela dyaka Yawu. Yawu ke baka mouvement, na yina Yawu ke katuka kunungisama, kusantisama, mbotika ya Mpeve-Santu, mpe ke basika na Mbuma! Beno me mona nzila Nzambi me landa? Na kunataka Nkumbu ya Yandi, ntangu nyonso, kaka na yisi mutindu mosi, samu ti Yandi kele Ndinga.

Beno tala, Yawu lenda ve kufwa. Ndinga ya Luzingu lenda ve kufwa.

<sup>56</sup> Beno tala mutindu ya kulunga, ntangu yayi. Ba yiminaka ve na wanzio ya lufwa na kubula bantu ya nene ya mayela ya Égypte. Ba yiminaka yandi ve na kubula bayinsi ya yandi ya kusakumuna, bayinzo ya yandi ya nene, ba-pharaon ya yandi. To, banganga-Nzambi ya yinsi, ba yiminaka ve na wanzio na

kubula. Yandi zolaka bula yinzo nyonso ya nene, kisika nyonso, muntu nyonso, kasi ya zolaka bula ve kisika mwana dimeme vwandaka.

Lufwa lenda ve kubula kisika kisika ya kukubama ya Nzambi keke, mpe ya keke na kati ya Mwana dimeme.

<sup>57</sup> Beno tala, mpe ve vwandaka . . . ba yiminaka yandi ve na kubula Israël to banganga-Nzambi yayi ya ba-Hébreu, mpe, to mosi ya ba-dénomination ya bawu. Nyonso fwana vwanda na kusola ya Nzambi, kisika ya kukubama, kana ve lufwa ke bula.

<sup>58</sup> Dibuundu, kisika nyonso beno keke, na yina beno keke, ya ke sala ata luswaswanu samu na munu. Kasi, ya keke na kima mosi beno fwana sala, beno fwana vwanda na kati ya Klisto to beno ke kufwa. Beno lenda ve kuzinga na ngaanda ya Yandi. Dibuundu ya beno lendaka vwanda nyonso ya kulunga, mutindu yinzo ya nene; kintwadi na kimpangi ya beno lendaka vwanda nyonso ya kulunga, mutindu muntu. Kasi ntangu beno ke manga Nzutu, Menga, Ndinga ya Yesu Klisto, beno me kufwa minuti beno ke sala yawu. Ya keke kisika ya kusambila yina Nzambi me sola. Ya keke kisika Nkumbu ya Yandi keke, kieleka. Ya keke kisika yina Yandi me sola samu na kutula Nkumbu ya Yandi; na dibuundu ve, kasi na kati ya Mwana, Yesu Klisto.

<sup>59</sup> Beno tala, nkebolo keke kaka na kisika yina Yandi me sola, na kati ya mwana dimeme ya Yandi, mpe na kati ya nkumbu ya mwana dimeme.

<sup>60</sup> Beno tala, ya vwandaka mwana-dimeme ya “bakala”, ya bakala, ya kento ve. Dibuundu ve, kento; kasi Nkumbu ya Yandi, nkumbu ya kento ve. Kisika Yandi zolaka kutana bantu vwandaka ve na nkumbu ya kento, kasi na Nkumbu ya Yandi, Bakala, Mwana ya dimeme!

<sup>61</sup> Ntangu yayi beto ke tuba, “Dibuundu, ya nene, dibuundu ya ngolo, yandi salaka *yayi* mpe yandi salaka *yina*. Yandi me kutana bamvula ya ngolo. Beto me fuluka na ntalu ya bantu. Beto keke mingi. Beto keke dibuundu ya ngolo. Yandi keke kima ya nene.”

Kasi Nzambi tubaka kima mosi ve samu na yina me tala kento. Yandi tubaka, “Bakala.” “Yandi,” keke kisika ya kukutana, Mwana-dimeme, na dibuundu ve. Nkumbu ya kento ve, kasi Nkumbu ya Bakala. Yandi tulaka ve nkumbu ya kento kisika nyonso. Yandi tulaka Nkumbu ya Yandi na kati ya “Yandi”!

Ya keke samu na yina, “Nyonso beto fwana sala, to kuzonza to kusala, beto fwana sala yawu nyonso na Nkumbu ya Yesu Klisto.” Kana beto ke sambila, beto fwana sambila na Nkumbu ya Yesu. Kana beto ke lomba kima, beto fwana lomba na Nkumbu ya Yesu. Kana beto ke tambula, beto tambula na Nkumbu ya Yesu. Kana beto ke zonza, beto zonza na Nkumbu ya Yesu. Kana beto ke botika, beto fwana botika na Nkumbu ya

Yesu Klisto. Samu ti, “Nyonso yina beto ke zonza to ke sala, beno sala yawu na Nkumbu ya Yesu Klisto.”

<sup>62</sup> Muntu mosi tubaka na munu kilumbu mosi, na kusololaka ti, yandi tubaka, “Mpangi Branham, kento ya munu, mu ve . . .” Yandi tubaka, “Yandi, nkumbu ya yandi kele *Kingandi*.” Yandi kele mulongi, yandi lenda vwanda ya kuvwanda awa ntangu yayi. Mpe yandi tubaka, “Kento ya munu,” yandi tubaka, “yandi kele na nkumbu ya munu.” Mu ke tuba kaka *Jones*, samu ti ya vwandaka ve *Jones*. Yandi tubaka, “Ntangu yayi, yandi fwana telama ve konso suka, kubaka kikombolo mpe kutuba, ‘Ntangu yayi mu ke kombola na nkumbu ya *Jones*, mpe mu ke sukula malonga na nkumbu ya *Jones*, mpe mu ke yidika bilele na nkumbu ya *Jones*.’” Yandi tubaka, “Mu banza ve ti beno fwana bokila nkumbu mosi na nyonso.”

Mu tubaka, “Mu banza ti beno fwana.” Ya kele kieleka.

Mpe yandi tubaka, “Mbote, samu na yinki? Ya lunga na yandi ve na kutuba yawu. Nyonso yina yandi ke salaka kele na nkumbu ya *Jones*, na kubanda.”

<sup>63</sup> Mu tubaka, “Kasi beno me tambulaka ve na bala-bala mpe kuzwa yandi, mpe kutuba, ‘Kwiza, *Jones*.’ Yandi fwana kuma, ntete, na nzila ya nkinzi, nkinzi ya makwela, ‘*Jones*.’ Kana ve, beno ke na kuzinga na kindumba. Mpe kana beno me botama na mutindu mosi yankaka ti na Nkumbu ya Yesu Klisto, ya kele mbotika ya kindumba, ya kele ve na kati ya Biblia.”

Dyaka, “Yina beno ke zonza mpe ke sala, beno sala yawu nyonso na Nkumbu ya Yesu.” Na manima ya yawu, yina beno ke salaka! Kasi ntete, beno kuzwa Nkumbu ya Yandi.

<sup>64</sup> Ya kele na bakento mingi ya mbote na kati awa na nkokila yayi, bakento ya mbote, ya kusungama; kasi ya kele na Madami William Branham mosi. Yandi kele yandi yina ke kwendaka na munu na yinzo. Yandi kele yina kele kento ya munu.

<sup>65</sup> Ya kele na bantu ya mbote na yinza, mabuundu ya mbote; kasi ya kele na Madami Yesu Klisto mosi, mpe ya kele yandi Yandi ke kwiza baka. Ya kele kisika Nkumbu ya Yandi kele. Ya kele kisika kusambila ya Yandi kele, na Kento mpe Yandi kaka. Ya kele kieleka. Oh, yinga, tata. Beto ke tala yawu kuvwanda kieleka.

<sup>66</sup> Ntangu yayi, ya kele samu na yina, beto, “Nyonso beto ke zonza to ke sala, beto sala yawu na Nkumbu ya Yesu Klisto.”

“Ya kele na nkumbu yankaka ve yina me pesama na yisi ya Mazulu samu na mpulusu, kana Nkumbu ya Yesu Klisto.” Actes, kapu ya 2, ke tuba ti, “Samu ti ya zabana na kati ya beno . . .” “Ya kele dyaka ve na nkumbu yankaka yina me pesama na yisi ya Mazulu na nzila ya yina muntu fwana vulusa, kaka na Nkumbu ya Yesu Klisto.” Amen. Mu banza ti beno me kuzwa yawu. Nkumbu ya Yesu Klisto, konso . . .



Mazulu ya kulutila zulu kele ya kubokila Yandi, “Dikanda nyonso na Mazulu kele ya kubokila Yesu,” Biblia me tuba, “mpe dikanda nyonso na zulu ya ntoto kele ya kubokila Yesu.” Na yawu ya kele Nkumbu Nzambi me sola mpe kisika Yandi me tula Yawu. Ya kele kisika ya Yandi ya kusambila, ya kele na kati ya Yesu Klisto. Ntangu yayi, beto zaba yawu kuvwanda kieleka, ata kisika yankaka ya kusambila kana na Yandi.

<sup>67</sup> “Ya kele na ata nkumbu yankaka na yisi ya Mazulu yina pesamaka na kati ya bantu, na yina ba fwana kuvuluka.” Yandi kele Nkumbu ya redemption ya Nzambi. Nzambi kele na nkumbu ba ke bokilaka Yehowa-jiré, Yehowa-rapha. *Yehowa-jiré*, “Mfumum lemvolila masumu ya nge nyonso.” *Yehowa-rapha*, “Mfumum ke belusaka bimbevo ya nge.” Yandi kele na bisalu mingi. Kasi Yandi kele na Nkumbu mosi ya redemption, yina me tala muntu, mpe yina kele Nkumbu ya “Yesu.” Ya kele Nkumbu ya Yandi, Yandi solaka na kutula. Wapi kisika Yandi me tula Yawu? Yandi me tula Yawu na kati ya Klisto.

<sup>68</sup> Bankumbu nyonso yankaka ya dibuundu, ba-credo, bisalu, kele lufwa na kusala kivuvu na yawu. Beno ke na kusala kivuvu na dibuundu ya ba-Méthodiste na kunata beno na Mazulu, beno me zimbana. Kana beno ke sala kivuvu na Bapantekote, dibuundu ya Pantekote na kunata beno na Mazulu, beno me zimbana. Mpe ba-Baptiste, ba-Luthérien, ba-Presbytérien, Katolika, dibuundu nyonso yankaka; beno ke na kusala kivuvu na nkumbu ya bawu, to kisalu ya bawu, to credo ya bawu, beno me zimbana.

Samu ti, beno lenda kwandi ve kusambila tii ntete beno kota na kisika ya kusambila. Amen. Ya kele kaka kisika yina Nzambi ke kutana na musambidi, ya kele kisika Yandi me sola na kutula Nkumbu ya Yandi. Nyonso yankaka yina, beno ke sala kivuvu na yawu, beno ke kufwa. Yandi mpe . . .

<sup>69</sup> Kivudi yankaka ya Yesu awa, mu me sonika na yisi, Masonuku. Mpe, Yandi—Yandi tubaka na ntwala awa, “Yandi fwana vwanda kukondwa kifu.” Kisika Yandi me tula Nkumbu ya Yandi, mwana dimeme yayi fwana vwanda kukondwa kifu.

Ntangu yayi, na wapi dénomination to système beno lenda tula yayi; na wapi dibuundu, Katolika, Misyoni, Juive, nyonso yina ya kele? Na wapi système, dénomination, beno lenda tula yawu, “kukondwa kifu na yawu”? Ya kele nyonso ya kutula na lweka, mpe ya kumanga!

Kasi ya kele na kisika! Alleluia! Kisika yango kele na kati ya Yesu Klisto. Ya kele na ata kifu ve na Yandi. Ya kele na ata foti ve na Yandi.

Beno lenda tula yayi ve. Bantu nyonso yina ke meka na kusala mutindu yina, ke tuba dibuundu ya bawu kele kukondwa foti mpe nyonso *yayi*. Ya kele nganzi, bayina ke zitisa ve Ndinga, bantu yina zola, ndambu ya kufwa, ya Laodicée, credo, kasi ya

kele Kieleka ve. Kasi ata Pilate yandi mosi, mbeni ya Yandi, tubaka, “Mu ke na kumona ata foti ve na Yandi.” Mbeni ya Yandi Mosi pesaka kimbangi ti ya vwandaka ve na ata foti na Yandi. Beno lenda tangila Yandi disumu mosi ve.

<sup>70</sup> Yandi tubaka na banganga-Nzambi ya bilumbu ya Yandi, “Nani ya beno lenda fundisa Munu na disumu? Nani lenda lakisa Munu ti Mu kele musumuki?”

Beno zabisa munu dibuundu mosi yina lenda tuba ti ata mbala mosi ve ti bawu me salaka kima ya yimbi. Na kieleka, ya kele na mosi ve ya bawu, na mpasi, kasi yina salaka bantu kufwa mpe salaka nyonso ya kele na manaka na kusala, na mpasi. Dyaka ba ke landila na kubokila bawu mosi. . . Na yawu ya kele ve kisika ya kukutana ya Nzambi samu na kusambila, na ata credo mosi to dénomination.

<sup>71</sup> Bankundi ya munu, mu zola ve kunyongisa, kasi Nsangu kele na zulu ya yintu ya munu, mpe, Nsangu yango kele, “Beno basika na muvusu yayi!” Mpe kana mu lomba beno na kubasika, wapi kisika mu ke nata beno? Mu ke nata beno na Branham Tabernacle? Ya kele na foti mingi mutindu mosi na mosi ya bawu.

Kasi ya kele na kisika mosi mu lenda nata beno, kisika beno ke kuzwa nkebolo mpe nkengolo na lufwa, ya kele na kati ya Yesu Klisto, kisika ya kusambila ya Nzambi. Ya kele kisika mu ke na kukotisaka beno, na nkokila yayi, kisika Nzambi ke tula Nkumbu ya Yandi. Kisika Yandi silaka ti Yandi ke kutana muntu nyonso yina ke kwiza kuna, Yandi ke sambila na yandi mpe ke sala feti na yandi, ya kele na kati ya Klisto; na ata dibuundu ve, na ata tabernacle.

Kasi, na kati ya Klisto, Yandi kele Tabernacle ya Nzambi. Yandi kele kisika yina Nzambi me kota, Yandi mosi, mpe me zinga na kati ya Yandi. “Yayi kele Mwana ya Munu ya luzolo, na Yandi Mu me sepela na kuzinga.” Ya kele kisika Nzambi me kwiza tabernacle, me nata Nkumbu ya Yandi mpe me tula Yawu na zulu, ya Yesu Klisto. Na yawu, Nkumbu ya Yandi kutulamaka na kati ya Muntu, Mwana ya Yandi, Yesu Klisto, na yina Yandi tabernacle Yandi mosi, mpe na kati ya Tabernacle yango.

Kisika, na kifwanisu, Jérusalem ya ntama, bafeti ya ntama, tempelo ya ntama, vwandaka kifwanisu; ntangu mulinga kukotaka, kilumbu yina nzasa kukotaka, ya ngwisani, mpe bakaka kisika, mpe Ndinga ya Nzambi kuwakanaka na yawu.

Na yawu Ndinga ya Nzambi kuwakanaka, na kukotaka na Tabernacle, Yesu Klisto; yina, ya Ntama (na kimuntu) vwandaka kifwanukusu mpe kivudi ya Malu-malu. Mpe ntangu Yandi kotaka na Klisto, Yandi tubaka, “Yayi kele Mwana ya Munu ya Luzolo, na Yandi Mu me sepela na kuzinga. Mpe Mu ke sola kisika Mu ke tula Nkumbu ya Munu, mpe kisika Mu ke kutana na muntu, mpe kisika Mu ke sambila.” Nzambi solaka kisika; na

ata dibuundu ya dénomination ve, kasi na kati ya Yesu Klisto. Yinga, tata.

<sup>72</sup> Yandi fwana vwanda mpe “kukondwa kifu,” mutindu mu vwandaka me tuba. Ata dénomination lenda tuba yawu. Ba ke salaka; ba kele mbeni ya Klisto.

<sup>73</sup> Ntangu yayi beto ke tala awa, beno tala kivudi ya Yandi dyaka. Ba fwana bumba mwana dimeme. Ntangu yayi, yayi kele na Exode 12, kana beno ke na kusonika yawu, Exode 12:3 tii 6. Ba fwana bumba mwana dimeme bilumbu yiya, samu na kutala, samu na kumona dyaka kana ya kele ya kulunga samu ba pesa na munkayulu. Ba fwana baka, kutala mpe kutala, bilumbu yiya, samu na kumona kana ya kele na kifu na yawu, na kumona kana ya kele na kimbevo na yawu, na kumona kana ya kele na kima yina kele mbote ve na mwana dimeme. Ba zolaka bumba yawu bilumbu yiya.

<sup>74</sup> Ntangu yayi beno tala. Bayankaka ya beno lendaka banza ti ya vwandaka mwa fyoti, kufwa na kumi na yiya. Kasi, beno bambuka moyo, ba vwanda baka mwana dimeme na kilumbu ya kumi ya ngonda, mpe kufwa yawu na kilumbu ya kumi na yiya ya ngonda, beno me mona, yina ba vwandaka bumba bilumbu yiya.

<sup>75</sup> Ntangu yayi, Yesu, Nkumbu ya Nzambi, Mwana dimeme, kwendaka na Jérusalem mpe basikaka dyaka ve tii na manima ya lufwa ya Yandi, luzikulu, mpe mvumbukulu. Ba bumbaka Yandi na yisi ya kuzonza yimbi bilumbu yiya mpe bampimpa yiya. Mutindu Mwana yango dimeme vwandaka kifwanukusu ya kulunga, kubumba bilumbu yiya. Ya kele ntangu Pilate tubaka, “Mu ke na kumona ata foti ve na Yandi.”

<sup>76</sup> Kivudi yankaka samu na Yandi, ata mukwa zolaka vwanda ya kuzengana na Yandi, ya vwandaka ya kulunga, ntangu ba lendaka. Na kufwa munkayulu, ba zolaka zenga ve mukwa. Kana ya vwandaka, ba vwandaka manga yawu. Mpe ba telemisaka yimeni marto samu na kuzenga mikwa na makulu ya Klisto, ntangu ba tubaka, “Yandi me kufwa yimeni.” Ba tobulaka lweka ya Yandi mpe talaka Menga mpe maza.

<sup>77</sup> Beno tala dyaka kima yankaka ya nene awa. Mu zolaka bika yawu ve, samu ti Yandi vwandaka talisama na minkayulu, munkayulu ya faline.

Mu ke bambuka moyo ti mbala mosi ba vwandaka na lukolo, na Biblia, yina ba vwanda bokila lukolo ya bapofete, mpe ya vwandaka kieleka lukolo. Mpe beto ke mona ti Élie kwendaka kuna na lukolo yango kilumbu mosi, mpe ba tubaka, “Beto. . .” Ba bondilaka yandi na kukwenda, ba tubaka, “Ntangu nge kele na kuzungila awa, bima kele ya kusungama mingi.” Na yawu ba zolaka ti yandi kwenda.

Mpe ba kwendaka kuzwa yandi kima ya kudya na nkokila. Mpe nkonga ya banganga-Nzambi kwendaka, to baprofete, samu na kuzwa mwa bambuma ya ndudi ya mfinda, samu na kusalila yandi kima ya kudya na nkokila. Mpe na yina ba vwanda sala, ba me lokuta tablier ya nene ya kufuluka na yawu; mpe ntangu ba me vutuka, ya vwandaka mwa-matiti, ya vwandaka bima ya kufwa, mpe ba losaka yawu na mbungu. Mpe supu bandaka na kutoka, mpe bawu, muntu mosi, tubaka, “Maama, ya kele na lufwa na kati ya mbungu. Ntangu yayi beto lenda kwandi ve kudya.”

Mpe Élie tubaka, “Beno natila munu faline na diboko.” Mpe yandi bakaka faline mpe losaka yawu na kati ya mbungu, mpe tubaka, “Beno kudya. Mbungu me beluka.”

<sup>78</sup> Munkayulu ya faline vwandaka Klisto. Konso mbuma zolaka vwanda mutindu mosi, mpe konso mwa kitini ya faline zolaka nikama mutindu mosi, samu na munkayulu ya faline. Na kulakisa ti Yandi kele Munganga. Yandi salaka kima, mpe katulaka lufwa, mpe tulaka Luzingu; na nzila ya misiku zole. Alleluia! Kisika lufwa kele, na kisika mosi; ntangu Klisto ke kwiza, Luzingu ke kwiza. Yandi kele mutindu mosi mazono, bubu yayi, mpe kukondwa nsuka. Mpe kisika ya vwandaka na lufwa, kuna ke kuma Luzingu, samu ti ba kotisaka Klisto na kati, munkayulu ya faline.

<sup>79</sup> Wapi baleso ya nene ti bima yayi lendaka vwanda kana beto baka ntangu ya kutala yawu fyoti-fyoti! Ntangu yayi, ata mpova mosi ve ya bivudi kukondwaka. Ata mpova mosi ntete kukondwaka, ya bivudi. Nyonso kufwanakanaka ya kulunga.

Yandi kele kisika ya kusambila yina Nzambi me sola, mpe Nkumbu ya Nzambi me pesama na Yandi. Yandi kele kisika ya kusambila ya Nzambi, mpe Nkumbu ya Nzambi me pesama na Yandi. Yandi kele Ndinga ya Nzambi, mpe Yandi kele Nkumbu ya Nzambi. Yandi kele nyonso zole Ndinga ya Nzambi mpe Nkumbu ya Nzambi. “Yandi vwandaka Ndinga yina kumaka nzutu.” Yandi vwandaka Ndinga ya Nzambi, Mwana dimeme ya Nzambi, Nkumbu ya Nzambi, mpe vwandaka Nzambi. Ya kele yina Yandi vwandaka, kisika ya kusola mpe kaka ya kusambila Nzambi.

<sup>80</sup> Mpe Nzambi mangaka kisika nyonso yankaka ti na Yesu Klisto; beno lenda ve kusambila Yandi kisika ni kisika. Yandi tubaka, “Ya mpamba ba ke sambilaka Munu, na kulongaka Malongi ya misiku ya bantu.” Bubu yayi beto ke na ba-credo, mpe ba-dogme nyonso, yina ke longisa ti *yayi* kele nzila mpe *yina* kele nzila.

Mpe Yesu tubaka, “Mu kele Nzila, Kieleka, mpe Luzingu, mpe muntu ve lenda kwiza na Nzambi kana na nzila ya Munu.” Na nzonzolo yankaka, “Mu kele Kielo ya lupangu ya mameme. Bayina nyonso na ngaanda kele miyibi.” Yandi kele nzila kaka.

Yandi kele Kielo. Yandi kele Nzila, Kieleka, Luzingu, nyonso yina ya kele; nkotolo kaka, kisika kaka, kukembila mosi kwandi, Nkumbu mosi kwandi.

Nyonso kele ya kukanga na Yesu Klisto. Ngwisani nyonso ya Ntama kele ya kukanga na Yandi. Ngwisani ya Malu-malu kele ya kukanga na Yandi. Mpe Dibuundu bubu yayi kele ya kukanga na Yandi, na nzila ya Ndinga ya musiku ya Yandi. Ya kele na kisika yankaka ve, to Nkumbu yankaka ve, to kisika yankaka, kisika Nzambi me silaka ntete na kukutana na muntu; kaka na kati ya Yesu Klisto, kisika ya kukembila yina Yandi me sola.

<sup>81</sup> Beno tala, Nzambi silaka na kukutana misambidi ya Yandi na kisika kaka mosi yayi, mpe ya kele ya kusola ya Yandi Mosi; ya kusola ya beto ve, ve ya dibanza ya beto; kasi ya kubanza ya Yandi, kusola ya Yandi. Mpe ya ke vwanda kisika Yandi ke tula Nkumbu ya Yandi, kisika Yandi me sola. Na yawu beto me tala ti beto me tala kisika Nkumbu ya Yandi vwandaka, yina Yandi solaka, na nzila ya kusola ya Yandi Mosi.

<sup>82</sup> Ntangu yayi na yina beto me tala kisika yina Yandi me tula Nkumbu ya Yandi, ya kele, na kati ya Klisto Yesu, mpe ya kele ve na kisika yankaka, to ve nkumbu yankaka, beno me sepela na yawu? Beno tuba, “Amen.” [Dibuundu me tuba, “Amen.”—Mu.] Ntangu yayi, dyambu kele ti, kana beto me tala kisika kisika kele. . . Kisika ya kusambila me ndimama ve kisika mosi, kaka na kati ya Klisto.

Beno lenda balula ntima, beno lenda sala yawu, kasi beno ke na kusambilaka ntete ve. Beno ke na kulomba pardo. Pierre tubaka. . .

Na kilumbu ya Pantekote, ntangu ba monaka bawu nyonso kuzonza na bandinga, mpe bidimbu ya nene mpe mambu ya ngitukulu kusalama, ba bandaka na kuseka, dibuundu salaka yawu, mpe tubaka, “Bantu yayi kele ya kufuluka na vinu ya malu-malu. Ba ke na kusala mutindu bantu ya kukola. . .” Marie mwense, bawu nyonso, vwandaka kintwadi, nkama na makumi zole ya bawu. Mpe ba vwandaka kwenda tengu-tengu mutindu bantu ya kukola, mpe vwandaka zonza na bandinga, mpe landilaka. Ba tubaka, “Bantu yayi kele ya kufuluka na vinu ya malu-malu.”

<sup>83</sup> Kasi Pierre, na kutelamaka, tubaka, “Bampangi, bantu yayi kele ve ya kufuluka na vinu ya malu-malu, samu ti yayi kele kaka ngunga ya tatu ya kilumbu. Kasi yayi kele yina zonzaka profete Joël, ‘Mpe ya ke salama na bilumbu ya nsuka, tubaka Nzambi, Mu ke tsyamuna Mpeve ya Munu na bantu nyonso; bana ya beno ya babakala mpe bana ya beno ya bakento ke pesa profes; na zulu ya bisadi ya Munu ya bakento mpe kisadi ya munu ya kento Mu ke tsyamuna Mpeve ya Munu. Mu ke lakisa bidimbu na zulu ya mazulu, mpe na zulu ya ntoto; tiya, makunzi ya tiya, mipepe ya tiya ya mulinga. Ya ke salama, ntete Kilumbu ya nene mpe ya

mpasi ya Mfumu kusalama, ti muntu nyonso yina ke bokila na Nkumbu ya Mfumu ke vulusa.”

<sup>84</sup> Ntangu ba kuwaka yayi, ba kusimbamaka na ntima ya bawu, mpe tubaka, “Bampangi, yinki beto lenda sala?”

<sup>85</sup> Pierre tubaka, “Beno balula ntima, mosi na mosi ya beno, mpe kuzwa mbotika na Nkumbu ya Yesu Klisto samu na lemvo ya masumu ya beno, mpe beno ke kuzwa dikabu ya Mpeve-Santu. Samu ti nsilulu kele tii samu na bansungi nyonso na bilumbu ya ntwala.” Ntangu yayi beto me mona yawu.

<sup>86</sup> Ntangu yayi beto zola kutala mutindu beto ke kota *na kati* ya Yandi. Wapi mutindu beto ke kota na kisika yayi ya kusambila? Ya ntete ya Corinthiens 12 ke kusukisa dyambu, samu, “Na nzila ya Mpeve mosi!” Ve na nzila ya dibuundu mosi, ve na nzila ya credo mosi, ve na nzila ya pasteur mosi, ve na nzila ya eveque mosi, ve na nzila ya nganga-Nzambi mosi. Kasi, “Na nzila ya Mpeve-Santu mosi beto nyonso kele ya kubotama na kati ya Nzutu mosi,” yina kele Nzutu ya Yesu Klisto, mpe bantu samu na konso dikabu yina kele na kati ya Nzutu yango. Yinga, tata! Na kukotaka ve, na kutangaka ba-credo ve, na kufulusama ve, na kubikaka na yisi, na kupesanaka mbote, to kima yankaka ve. Kasi, na nzila ya Mbutukulu beto kele ya kubotama na kati ya Nzutu ya Yesu Klisto! Amen. “Na nzila ya Mpeve-Santu mosi beto nyonso kele ya kubotama na kati ya Nzutu mosi.”

<sup>87</sup> Mpe yinki kele Nzutu yango? “Na mbandukulu vwandaka Ndinga, mpe Ndinga vwandaka na Nzambi, mpe Ndinga vwandaka Nzambi. Mpe Ndinga vwandaka muntu mpe zingaka na kati-kati ya beto.” Wapi mutindu beto lenda vwanda na kati ya Nzutu yango mpe kumanga Ndinga mosi ya Yawu, to kutula Yawu kisika yankaka ti Yawu kele kwandi ve na kati ya Nzutu? Wapi mutindu beto lenda ntete kusala yawu? Kisika Nzambi me sola!

<sup>88</sup> Beno tala, mpe na yina beno me botama ya kieleka na kati ya Yandi, kimbangi ya kieleka kele ti beno ke kwikila Yandi, Ndinga.

Wapi mutindu beno lenda vwanda kitini ya Yandi mpe dyaka kumanga Yandi? Wapi mutindu mu lenda manga diboko ya munu na kuvwanda diboko ya munu? Kana ya . . . Kana mu sala yawu, ya kele na kima ya yimbi na yintu ya munu. Mpe wapi mutindu mu lenda? Kana ya kele na kima ya yimbi na yintu ya munu, kumanga ti ya kele diboko ya munu, kumanga ti ya kele dikulu ya munu, ya kele na kima ya yimbi na kimpeve na mukwikidi yina ke mangaka Ndinga nyonso yina Nzambi tubaka ntete mpe silaka. Ya kele na kima ya yimbi na kimpeve na mukwikidi yango ya kufwanikisa.

<sup>89</sup> Beno lenda ve kumanga mukanda mosi ya Yandi, samu ti beno me kuma kitini mosi. Beno kele kitini ya Yandi samu ti beno kele ya kubotama na kati ya Yandi; na nzila, Mpeve-Santu

me nata beno na kati ya Nzutu ya Yesu Klisto. Wapi mutindu ya kima ya kitoko!

<sup>90</sup> Nzambi kuzwaka kisika mosi yina Yandi kutanaka—Yandi kutanaka na Abraham, mpe kuna Abraham kusambilaka. Nzila nyonso ya Ngwisani!

Mpe Ndinga ya Yandi ke vwanda ya kutendula na kati ya beno, na nzila ya Yandi. Beno me tala yawu? Ndinga yina Yandi silaka na kulungisa na kilumbu yina beno ke na kuzingaka: beno ke vwanda mukanda ya kusonama ya Nzambi, yina bantu nyonso ke tanga. Yina ve beno ke tuba, kasi yina Nzambi ke sala na nzila ya beno, ke zonza ngolo mingi kulutila kima nyonso beno lenda tuba. Nzambi tubaka, “Bidimbu yayi ke landa bayina ke kwikila.” Ya ke zonza na nzila ya beno.

<sup>91</sup> Yandi kuzonzilaka na nsungi yayi, yinki zolaka vwanda ntangu yayi. Mikwikidi ya nsungi yayi fwana kwikila Yayi, yina Yandi silaka bubu yayi. Kaka mutindu ba zolaka kota na nzasa, samu na kuvuluka; kudasika na Égypte samu na kuvuluka; ba zolaka kota na Klisto, samu na kuvuluka ntangu yayi, na kati ya Ndinga ya Nsangu, ti Yandi kele mutindu mosi mazono, bubu yayi, mpe kukondwa nsuka.

<sup>92</sup> Wapi mutindu beno ke kota na kati ya Yawu? Na mbotika! Na mbotika ya yinki, ya maza? Na nzila ya Mpeve-Santu! “Mpeve mosi, beto kele nyonso ya kubotama na kati ya Nzutu mosi yayi.”

<sup>93</sup> Mpe Ndinga ya Yandi ya kusila, Yandi ke ve. . . Beno ke zola kutendula Yawu. Yandi ke tendula Yawu na nzila ya beno; yina beno ke na kusalaka, yina Yandi silaka na kusala. Dibuundu yina ke landa Yandi ke vwanda nyonso mutindu Yandi tii bantu ke zaba.

Beno tala Pierre mpe Jean ntangu ba yufulaka bawu na kubelusaka muntu na nkololo yina ba bokilaka Kitoko. Ba tubaka, “Ti ba talaka,” banganga-Nzambi yango talaka, “ti ba vwandaka bawu nyonso zole bantu yina zabaka kima ve mpe bantu yina longokaka ve,” kasi ba talaka ti ba vwandaka na Yesu. Samu ti, (Yinki?) ba vwandaka sala bima yina Yandi salaka.

<sup>94</sup> Yandi zolaka tala kisalu ya Tata. Mpe bubu yayi ya zolaka vwanda mutindu mosi.

<sup>95</sup> Ntangu yayi, beno bambuka moyo, Yandi kele mutindu mosi mazono, bubu yayi, mpe kukondwa nsuka; samu ti Nzambi ke kutana na beno na kati ya Yandi, kisika kaka yina kele; samu ti ya kele kisika Yandi me sola na kutula Nkumbu ya Yandi, na kati ya Yesu. “Yesu” kele Nkumbu ya Nzambi. Beno bambuka moyo, Tata, Mwana, Mpeve-Santu, kele bisalu ya Nkumbu “Yesu Klisto.”

<sup>96</sup> Ntangu Matthieu tubaka, “Beno kwenda, longa bayinsi nyonso, na kubotikaka bawu na Nkumbu ya Tata, ya Mwana, mpe ya Mpeve-Santu.”

Mutindu ba me tendula yawu yimbi bubu yayi, mpe ke tuba, “Na nkumbu ya Tata, nkumbu ya Mwana, nkumbu ya Mpeve-Santu.” Ya kele kwandi ve ya kusonama. Ya kele, “Na Nkumbu,” mosi, “ya Tata, Mwana, Mpeve-Santu.” *Tata* kele ve nkumbu, *Mwana* kele ve nkumbu, *Mpeve-Santu* kele ve nkumbu; ya kele kisalu.

Bilumbu kumi na ntuala, Pierre telamaka mpe tubaka, “Beno balula ntima, mosi na mosi ya beno, mpe kuzwa mbotika na Nkumbu ya Yesu Klisto.” Na yina yandi salaka yina Yandi tubaka ve na yandi na kusala? Yandi salaka yina Yandi tubaka na yandi na kusala. Nkumbu ya Tata, Mwana, mpe Mpeve-Santu kele “Mfumu Yesu Klisto.” Muntu nyonso na Ngwisani ya Malu-malu vwandaka ya kubotama na Nkumbu ya Mfumu Yesu Klisto.

<sup>97</sup> Muntu mosi ve na kati ya Biblia kuzwaka ntete mbotika na bisalu ya Tata, Mwana, Mpeve-Santu. Yina kusalamaka ata fyoti ve tii credo ya Nicée kubotamaka na Nicée, na Rome. Ya vwandaka lutumu ya dibuundu ya Katolika, yina vwandaka, pesa kimbangi ya kima mosi, na catéchisme. Mu me kuzwa yawu, ya kele mbote, *Matsyelika Ya Lukwikilu Ya Beto*, mpe nyonso yankaka, yina ya kele kieleka credo ya Katolika ya Rome. Ba ke tuba na beno ya kele ve na kati ya Biblia; kasi ba ke tuba ti ba kele na ngolo ya kusobisa Mambu yayi, kana ba zola, samu na pape. Mu kele ntima mosi ve.

Yesu Klisto kele mutindu mosi mazono, bubu yayi, mpe kukondwa nsuka. “Mpe muntu nyonso yina ke katula mosi ya Ndinga ya Biblia yayi,” tubaka Yesu, “to ke tula mpova mosi na Yawu, ba ke katula kitini ya yandi na Buku ya Luzingu.” Ndinga mosi; nsasa mosi ve ya bisono, to kitini ya bampova, kasi Ndinga! “Muntu nyonso yina ke katula Ndinga mosi . . .”

<sup>98</sup> Na mbandukulu, Nzambi pesaka ngolo na bantu ya Yandi na Ndinga ya Yandi. Ndinga mosi, ya kutentula yimbi, nataka konso lufwa, konso yintu mpasi, konso mawa. Ève, yandi kondwaka nsasa mosi ve ya bisono; yandi kondwaka ve Ndinga. Ntangu Yesu kotaka na kati-kati ya Buku . . . Yina vwandaka kubanda ya Buku.

Ntangu Yesu kotaka na kati-kati ya Buku, yinki Yandi tubaka? “Ya kele ya kusonama ti muntu ke zinga ve na nzila ya dimpa kaka, kasi na nzila ya konso Ndinga yina ke basika na yinwa ya Nzambi.”

Na nsuka ya Buku, na Apocalypse kapu 22, na nzila 18, kitini ya kieleka ya nsuka ya Biblia, Yesu zonzaka Yandi mosi, tubaka, “Mu ke pesa kimbangi ti kana muntu nyonso kukatula Ndinga mosi ya Buku yayi, to kubwela mpova mosi na Yawu, ba ke katula kitini ya yandi na Buku ya Luzingu,” samu ti yandi kele profete ya luvunu mpe me pesa bantu kutendula ya yimbi, mpe menga ya bawu ke kubwa na diboko ya yandi, samu na kusalaka yawu.



<sup>99</sup> Beto fwana bumba kisika mosi yango ya kukembila, ya kele, Yesu Klisto Ndinga, mutindu mosi mazono, bubu yayi, mpe kukondwa nsuka. Amen. Mbote mingi. Beno bambuka moyo, ya kele ve na ata kisika yankaka ya kukutana samu na kukembila, kisika mosi ve. Nzambi solaka Yawu.

<sup>100</sup> Jean, ya me kuma ntama kuna na singa na kati-kati ya Ngwisani ya Malu-malu mpe ya Ntama. Beno kuwa mbote ntangu yayi. Beno tala mbote. Jean, ngononi yina ya nene, yina katuka na mfinda na kupumbukaka kilumbu mosi, mapapu ya yandi ya nene ya kutandama. Yandi kukumaka na simu ya Jourdain, profete ya nene ngononi yina vwandaka kyamvu na kati-kati ya Ngwisani ya Ntama mpe ya Malu-malu, mpe yandi bokilaka bawu katuka diboko ya bakala mpe diboko ya kento. Yandi vwanda bokila kilumbu ya kubalula ntima.

Kisika ba-Pharisien mpe ba-Sadducéen kubasikaka; yandi tubaka, “Beno banda ve na kutuba na kati ya beno mosi, ‘Beto kele na Tata ya beto Abraham,’ samu ti mu ke tuba na beno Nzambi kele na kiyeka na matadi yayi na kubasisa bana ya Abraham.” Oh, la la!

Ntangu yandi me banda na kubasisa Nsangu ya mbote, mpe kutuba, “Ya kele na Mosi na kati ya beno, Yina beno zaba ve. Mu me bakula ntete Yandi ve, kasi mu ke zaba Yandi ntangu Yandi ke kwiza. Mu kele ve ya kulunga na kufungula dipapa ya Yandi. Kasi Yandi ke botika beno na Mpeve-Santu mpe Tiya. Mpe Yandi kele na diboko ya Yandi; Yandi ke tsyemisa yisi ya Yandi nyonso, mpe Yandi ke nyengisa matiti na Tiya yina ke kufwaka ve.”

<sup>101</sup> Ngononi ya nene yina ya Nsangu ya mbote yina vwandaka kuna, na yina yandi vwandaka boka na ngolo bakukangisa ya yandi ya nene. Mpe yimbi me basika, to Hérode, mfumu na ntangu yina, muzabisi, kwelaka kento ya mpangi ya yandi ya bakala. Mpe beno lenda banza ti ngononi ya nene ya Nsangu ya mbote yina kuvwanda kuna mpe kuvwanda ya yandi swi na yina?

Bayankaka ya bawu tubaka, “Kulonga ve makwela mpe kufwa makwela na ntangu yayi, Jean, samu ti Hérode kele kuna.”

<sup>102</sup> Yandi me belama kaka na ntwala ya yandi mpe me tuba, “Ya kele ya kulunga ve ti nge vwanda na yandi.” Kieleka!

Yinki, yandi, vwandaka yina? Yandi vwandaka ngononi yango ya mfinda. Ba longisaka yandi ve na yisi ya boma mpe bakukangisa ya muntu, ya dénomination mosi. Kasi ba longisaka yandi na yisi ya ngolo ya Nzambi ya Ngolo nyonso, samu na kuzaba yinki zolaka vwanda kuna. Yandi zabaka kotalana ya Mesiya.

Alleluia! Mpova zola kutuba, “Lukumu na Nzambi ya beto!” Beno vwanda na boma ve. Mu me salaka ntete muntu mpsi ve. Mu kele na ntima na zulu ve. Mu zaba kaka kisika mu kele.

Oh, ntangu mu ke banza na yandi, ngononi yango ya nene yina pumbukaka kuna mpe vwandaka! Yandi tubaka, “Mu ke zaba Yandi ntangu Yandi ke kwiza.”

<sup>103</sup> Kilumbu mosi yandi vwandaka ya kutelama kuna, vwandaka longa. Banganga-Nzambi vwandaka na lweka yankaka, ba tubaka, “Nge zola kutuba ti ya ke na kwiza ntangu ba ke katula munkayulu ya konso kilumbu; tempelo ya nene yayi yina beto tungaka, mpe ksalu nyonso yina beto salaka, beto dénomination ya nene?”

Yandi tubaka, “Ya ke kwiza ntangu nyonso yina kusalamaka ke luta.”

“Ya lenda vwanda ve. Nge kele profete ya luvunu!”

<sup>104</sup> Mpe yandi me tala bisika nyonso. Yandi tubaka, “Beno tala, Yandi yayi! Beno tala kisika ya kukembila yina Nzambi me sola. Beno tala Mwana dimeme, Mwana dimeme yina ke katulaka disumu ya yinza.” Yandi tubaka ve, “Beno tala Méthodiste, beno tala Baptiste, to Katolika.” Yandi tubaka, “Beno tala ke na kwiza Mwana dimeme ya Nzambi yina ke katulaka disumu ya yinza.”

Kizunga kaka ya nkebolo yina kele ya kele na kati ya Mwana yango ya dimeme ya Nzambi. Na kati ya Yandi kaka kele mpulusu; ve na ata dibuundu, na ata credo, na ata bantu, na ata tata, na ata mama, na ata muntu ya santu, to kima mosi, kisika ya santu. Ya kele na kati ya Nzambi ya Santu, Mfumu Yesu Klisto, kisika Nzambi tulaka Nkumbu ya Yandi na muntu ya Moyo, samu na redemption, Yina futaka ntalu samu na beto misumuki. Ya kele kisika kaka yina ya kele na mpulusu. Ya kele Ditadi yina mu ke telamaka.

<sup>105</sup> Jean kuzabaka Yandi. Yandi tubaka, “Mu zabaka Yandi ve ntangu mu monaka Yandi kubelama, kasi kuna kisika mu tangaka. . . .” Ve na seminere mutindu papa ya yandi kusalaka; ve mutindu nganga-Nzambi, ba me longisa. Kasi na mfinda, kisika yandi vwandaka na seminere ya théologie ya Nzambi ya Ngolo nyonso, kuingilaka na Ndinga ya Nzambi; ve yina nkonga mosi ya bantu me tala mbote-mbote, kasi yina Nzambi me tuba na zulu ya Yawu. Mpe na yina Jean talaka na zulu mpe monaka Mpeve kukwiza, yandi tubaka, “Mu me pesa kimbangi, ti yayi kele Yandi.” Oh, la la!

Beno tala kisika ya beno ya kukembila. Beno tala kisika ya beno ya kubumbama. Beno tala Mwana dimeme ya Nzambi yina ke katulaka disumu ya yinza. Ve ata dibuundu, ata credo, to kima yankaka ve, kasi Mwana dimeme ya Nzambi yina ke katulaka disumu ya yinza.

<sup>106</sup> Beno me mona mutindu Jean tulaka yawu? Yandi tubaka ve, “Beno ba-Pharisien beno kele na kieleka, beno ba-Sadducéen, ba-Hérodien.” Yandi tubaka, “Beno tala Mwana ya dimeme.”

Yina kele kisika. Yandi kele na Nkumbu. Yandi kele Yandi yina. Ve nkumbu yankaka na yisi ya Mazulu!

<sup>107</sup> Beto tala mbote yina Yesu tubaka na yina me tala Jean awa. Kilumbu mosi Jean fidisaka na Yandi, samu na kumona yinki Yandi vwandaka sala. Yesu tubaka na yandi, “Yandi vwandaka nsemo ya nene yina ngengaka,” samu na kulakisa bawu nzila ya kieleka yina ba zolaka landa ntete kilumbu ya Yandi ya kuvutuka, kilumbu ya Yandi ya kuvutuka ya ntete. Beno kuwa mbote. Beno kondwa yawu ve. Yesu tubaka, “Jean vwandaka nsemo yango.” Malachie 3, foti kele ve! Profete na nsemo ya nene yina vwandaka ngenga kuzabaka Yesu mutindu kuvwandaka Yina kaka, “Mwana dimeme.” Bana nyonso yankaka ya mameme yina banganga-Nzambi yayi vwandaka zonzila, mpe bima nyonso ya bawu yankaka yina, vwandaka bulawu. Awa vwandaka “Mwana dimeme!” Muntu na nsemo ya nene yina vwanda ngenga, yina Yesu tubaka ti yandi vwandaka.

Malachie 3 ke tuba, “Mu ke fidisa muzabisi ya Munu na ntwala ya Munu samu na kukubika nzila.” Mpe yandi yina ba fidisaka na kukubika nzila, kuzabaka Yandi, kisika. “Ya kele Yandi! Ya ke na kifu ve. Ya kele Yandi! Mu me mona kidimbu ke landa Yandi. Mu zaba ti yina kele Yandi; Nsemo me katuka Mazulu mpe me kwiza na zulu ya Yandi.” Ya vwandaka kieleka, ti ya vwandaka Yandi.

<sup>108</sup> Na yina, mpangi ya munu, mu zola kulomba beno kima, na kumanisa. Beto lenda tuba yayi. Na Malachie 4, ya me silama ve na beto ngononi yankaka, na Dikunzi ya Nsemo ke landa, samu na kulakisa na dibuundu na foti ya kilumbu yayi ti Yandi kele Hébreux 13:8, “mutindu mosi mazono, bubu yayi, mpe kukondwa nsuka”? Ya me silama ve na beto mosi yankaka yina ke kwiza na kupumbukaka katuka mfinda? Amen! Ya kele kaka Kieleka. Wapi mutindu ya kulunga mpe ya kufwanakana ya kele na Luc 17:30, kisika Mwana ya muntu (Ngononi) ke talisama Yandi mosi samu na kufwa kimakulu ya bisika nyonso yankaka ya kukembila, mutindu ba-dénomination mpe nyonso yankaka yina!

Nzambi me sola kisika ya Yandi. Jean tubaka, “Yandi Yayi!”

<sup>109</sup> Mpe dyaka ba silaka beto kima mutindu mosi na kilumbu yayi, Malachie 4, “Samu na kuvutula bantima ya bana,” samu na kutuba ti Yandi kele ya kufwa ve, ti bima yayi kele ve samu na nsungi yankaka; mbotika na Nkumbu ya Yesu vwandaka ve samu na kilumbu ya me kuma ntama kuna, kasi Yandi kele mutindu mosi ntangu yayi. Amen. Samu na kufwa bisika nyonso yankaka ya kukembila, ya kele yina ngononi ya kilumbu ya nsuka ke sala, samu na kulakisa ti nyonso yankaka yina kele bulawu, dénomination kele bulawu, kasi kulakisa yawu dyaka na kidimbu mutindu mosi yina Yandi salaka, ti Yandi kele

mutindu mosi mazono, bubu yayi, mpe ntangukukondwa nsuka. Alleluia!

<sup>110</sup> Dyaka, na Apocalypse 4:7, beto ke na Bibulu yiya yina beto vwandaka me longoka.

Ya ntete yina vwandaka, beto talaka...beto talaka, vwandaka nkosi. Yina vwandaka Niama ya ntete yina kwendaka kutana kutelemina ya kilumbu yina, Nkosi ya Dikanda ya Judas.

Na manima ya Yandi me landa Kibulu. Mpe beto talaka, ti Kibulu yina vwananda landa vwandaka ngombe, yina kele kibulu ya kizitu, ya munkayulu. Na bilumbu ya cathédrale ya Rome, Dibuundu kufwaka; munkayulu.

Yankaka yina kwizaka, vwandaka muntu, vwandaka Kibulu na kizizi ya muntu. Mpe muntu yina vwandaka ba-reformateur, malongi ya muntu, théologie, mpe nyonso yina.

Kasi Kibulu ya nsuka yina zolaka pumbuka, Kibulu ya nsuka yina zolaka kwiza, Biblia ke tuba ti ya vwandaka ngononi yina ke na kupumbuka. Alleluia! Mpe profete tubaka, na kilumbu yayi, “Ya ke vwanda na Nsemo.” Oh, la la! “Na kilumbu yango ya ke vwanda na Nsemo.”

<sup>111</sup> Ba-reformateur kuzwaka kilumbu. Kivudi kuzwaka kaka kilumbu, ba lenda bokila ve kilumbu to mpimpa. Kasi na ntangu ya nkokila, na ntangu ya Ngononi:

Ya ke vwanda na Nsemo na ntangu ya Ngononi,  
Beno ke mona kieleka nzila ya Nkembo;  
Na nzila ya maza kele Nsemo bubu yayi,  
Luzikulu na Nkumbu ya ntalu ya Yesu.  
Ntwenya mpe kuluntu, beno balula ntima ya  
masumu ya beno nyonso,  
Kieleka Mpeve-Santu ke botika beno na kati;  
Samu ti Bansemo ya nkokila me kwiza,  
Ya ke lakisa ti Nzambi mpe Klisto kele Mosi.

<sup>112</sup> Amen! Ya ke vwanda na Nsemo na ntangu ya nkokila, kisika kaka yina me sola Nzambi samu na kusambila. Oh, yinki Nsangu yayi me kwiza sala, yinki Yandi ke sala? Mpe na kilumbu ya Yandi ya ke vwanda na Nsemo na ntangu ya nkokila, mpe (yinki?) kuyamba bana ya Yandi bayina ke kota na yinzo na Yinsi ya kieleka ya kusila, na nzila ya kidimbu mosi ya Dikunzi ya Tiya yina twadisaka bana ya Israël na nzila ya ntoto ya kuyuma.

Kisika me sola Nzambi samu na kukembila, Yesu Klisto. Yina kele kisika kaka yina ya kele. Yina kele Nkumbu kaka yina Nzambi me kuzwa samu na mpulusu. Ya kele yina Yandi me bokila dikanda na Mazulu, ntangu ba kele na zulu ya ntoto, ya kele Yesu Klisto.

<sup>113</sup> O dibuundu, O bantu, nkundi ya musumuki, beno sala kivuvu na kima yankaka ve kasi Yesu Klisto. Beno sala kivuvu na ata mulongi ve. Beno sala kivuvu na ata muntu yankaka ve

samu na kuvuukisa beno. Beno sala kivuvu na ata dibuundu ve, na ata credo, na ata dénomination. Beno sala kivuvu kaka na Yesu Klisto, samu ti Yandi keke Nsemo ya ngunga.

Beto kulumusa bayintu ya beto.

Ya ke vwanda na Nsemo na ntangu ya nkokila,  
 Beto ke tala kieleka nzila ya Nkembo;  
 Na nzila ya maza keke Nsemo bubu yayi,  
 Luzikulu na Nkumbu ya ntalu ya Yesu.  
 Ntwenya mpe kuluntu, beno balula ntima ya  
 masumu na beno nyonso,  
 Kieleka Mpeve-Santu ke kota na kati;  
 Bansemo ya nkokila me kwiza,  
 Ya ke lakisa ti Nzambi mpe Klisto keke Mosi.

<sup>114</sup> Oh, mpangi ya bakala, mpangi ya kento, kana beno me balula ntima ntete ve, kana beno me botamaka ve na Nkumbu ya Yesu Klisto, beno zola kusala ya kubanda na nkokila yayi? Beno zola kupesa Nzambi ntangu ya mbote-mbote ya kuyamba beno na kati ya kisika kisika beno lenda kembila Yandi? Beno bambuka moyo, na ngaanda kuna, ya keke na ata kisika yina Nzambi silaka na kukutana beno mpe kuyamba kukembila ya beno.

<sup>115</sup> Beno ke tuba, “Mpangi Branham, mu ke sambilaka kaka na ntima ya kusungama!” Mutindu mosi salaka Caïn. Yandi salaka mutindu nyonso ya munkayulu yina Abel kusalaka, kasi ya vwandaka munkayulu ya yimbi. Beno lenda kwenda na dibuundu, mpe kufuta kinkuku ya beno ya kumi, mpe kusala kusalu ya beno mutindu Muklisto zolaka, kaka mutindu ya kusungama mutindu bakala to kento nyonso.

Mu me telama awa ntangu yayi mwa bamvula makumi tatu, bisika nyonso na mbanza awa, mpe me boka Nsangu kaka yayi. Mu ke na kukumaka kiboba. Mu lenda vwanda dyaka mingi ve na beno. Kasi beno bambuka moyo, na Kilumbu ya Lufundusu, ndinga ya munu me bakama na bande, mpe ya ke wakana dyaka na beno.

<sup>116</sup> Ya keke na kisika kaka mosi yina Nzambi me tula Nkumbu ya Yandi, mpe ya keke ve na kati ya dibuundu mosi, kasi na kati ya Yesu. Ya keke kaka na kisika mosi ya kukembila, kaka kisika mosi beno ke yambama, mpe ya keke na kati ya yina ya Luzolo, Yesu Klisto. “Ya keke ve na nkumbu yankaka na yisi ya Mazulu, yina ba pesaka na kati ya bantu, samu na kuvuuka,” ata dibuundu, ata credo, ata kima mosi ve. Yesu Klisto!

Mpe ya zolaka vwanda Nsangu ya ngunga, “Samu na kuvutula bantima ya bana, kuvutula na Lukwikilu yina pesamaka na basantu mbala mosi.” Beno zola ve kundima Yawu na nkokila yayi?

Mpe na yina beto ke na bayintu ya beto ya kukulumusa.

<sup>117</sup> Mpe bayina ke zola ti ba bambuka moyo na bawu na bisambu, beno zola kaka kutelemisa maboko ya beno. Beto lenda ve kusala mbokolo na chaire, samu ti bantu kele kaka mingi. Nzambi kusakumuna beno. Oh! Na diboko ya munu ya kento, mu banza ya kele na bankama tatu.

<sup>118</sup> Ntangu yayi na diboko ya munu ya bakala, beno zola kutelemisa maboko ya beno, kutuba, “Mu zola ti ba bambukila munu moyo.” Mu banza ti ya kele na nkama mosi na makumi tanu, to ya kuluta, na diboko ya munu ya bakala.

Beto ke na tabernacle na yisi awa na dilonga ya nene ya maza; pasteur, pasteur ya mbote, Mpangi Orman Neville, ba-associé, bantu ya bisika yayi awa yina beno me mona mpe me kutana. Konso kilumbu, konso nkokila, konso ngunga, bantu yina zola kuzwa mbotika, yina me balusa ntima, ya kele ntangu nyonso ya kuyilama. Mpe kana beno tumama na musiku yango, beno ke vwanda kieleka, na nzila ya nsilulu ya Nzambi, kana beno kele ya kusungama na ntima ya beno, samu na kuyamba mbotika ya Mpeve-Santu.

<sup>119</sup> Ya kele na kisika kaka mosi samu na kusambila. Ntangu yayi, yina kele ve na tabernacle. Ya kele na kati ya Klisto. Wapi mutindu beto ke kota na kati ya Yandi? “Na nzila ya Mpeve mosi beto nyonso ke botama na kati ya Nzutu mosi yayi.”

Beto sambila.

<sup>120</sup> Nzambi ya luzolo, na yina maboko yayi me telama, ba me lakisa yina vwandaka na manima ya diboko yango na ntima, kundima ti ya kieleka ba ke na nsatu ya lusalusu ya Nge. Mu ke sambila na mosi na mosi ya bawu, Tata. Mpe mu ke tanga Ndinga ya Nge. Nge tubaka, “Yandi yina ke kuwa Ndinga ya Munu, mpe ke kwikila na Yandi yina fidisaka Munu, ke na Luzingu yina ke suka ve, mpe ke kwiza ve na Lufundusu; kasi me luta lufwa na Luzingu.”

Tata, kaka vwandaka me katuka mbanza banlumingu fyoti, me vutuka, me lomba, “Mpe yandi *yayi*?”

“Kasi, ba me kwenda.”

“Mbote, samu na . . .”

“Ba me kwenda.”

<sup>121</sup> Nzambi ya luzolo, mosi na mosi beto ke na kubokilamaka, mosi na mosi beto fwana kununga na kusabuka na nzila ya dibenga ya kivudi ya lufwa. Mpe ya kele samu na mosi na mosi ya beto, mutindu bantu yina ke kufwa. Kasi, na nkokila yayi, Nge me pesa beto ndombolo ya Nge, ti kana beto ke kwikila na Yandi mpe kuzwa mbotika na Nkumbu ya Yandi, ti Nge ke baka beto na kati. Mpe kuna na kati ya Nzutu yayi, Nzutu ya Klisto, na dibuundu ve, kasi na kati ya Nzutu ya Klisto, Nzutu yina ba me fundisa yimeni. Ya ke kwiza ve na Lufundusu. Nzambi tsyamunaka nganzi ya Yandi na zulu ya nzutu yina, mpe nzutu

yango kele kimpwanza na disumu; mpe, na kuvwandaka na kati ya Yandi, me tula beto na kimpwanza ya disumu, na nzila ya Kukatula-masumu ya Yandi yina kufwaka samu na beto. Mpe na kati kuna beto kele na kintwadi ya kimpangi mosi na yankaka, na yina Menga ya Yesu Klisto, Mwana ya Nzambi, ke bumba beto ya kuvedila na disumu mpe mvindu nyonso.

<sup>122</sup> Tata Nzambi, mu ke sambila ti Nge ke baka mosi na mosi ya bawu na kati ya Kimfumu ya Nge. Pesa yawu, Nzambi. Ti ya vwanda ve na mosi ya bawu yina ke zimbana; ti ya vwanda ve na mwana ya bakala to ya kento, bakala to kento. Mfumu, bayankaka ya bantu ya munu mosi kele ya kuvwanda awa, na nkokila yayi, bayina kele na ngaanda ya yisi ya Menga yango. Wapi mutindu mbote mu lenda bambuka moyo na bampova ya papa ya munu! Mpe mu ke sambila, Nzambi ya Luzolo, ti ata mosi ya bawu ke zimbana. Pesa yawu, Mfumu. Mu ke na kukwikila Nge ntangu yayi, na nyonso yina kele na munu na kukwikila.

<sup>123</sup> Sala na zulu ya bampangi ya munu ya babakala, ya bakento, na bankundi ya munu, awa na kisika yayi na nkokila yayi mpe bayina kele kuna na nzila ya alo-alo. Bayinsi mingi ya mutindu na mutindu ke na kuwa, nzila nyonso katuka Simu ya Esete tii Wesete. Mu ke sambila, Nzambi ya Luzolo, bisika nyonso kuna na lweka ya bantoto ya kuyuma na Tucson, kuna na Californie, na zulu na Nevada mpe Idaho, kuna na Esete mpe bisika nyonso, na Texas; na yina mbokolo yayi me pesama, bantu me vwanda na—na mwa mabuundu, na ba-station, na bayinzo, ke na kuwa. O Nzambi, ti bakala to kento ya kuzimbana yina, mwana ya bakala to ya kento, na ngunga yayi, kwiza na Nge. Pesa kaka yawu ntangu yayi. Beto ke lomba yawu na Nkumbu ya Yesu, ti ba ke tala kisika ya nkebolo yayi na yina ntangu kele.

Ntangu, beto ke mona nsonokono na kibaka, ntoto ke na kudasuka, ntangu ya délivrance me belama. Ndambu ya yinsi ya beto ke na kudyama, kisika yankaka ke na kuningana na kupasukaka landila bakuningana ya ntoto, mutindu Yesu silaka ti ya ke vwanda. Ti ya vwanda yinda mingi ve samu na bawu, Mfumu. Ti ba ndima yawu ntangu yayi, samu ti beto me lakisa bawu na Nge mutindu ba-kupe ya lukutakanu, ya Nsangu ya mbote, na Nkumbu ya Yesu. Amen.

<sup>124</sup> Beno ke kwikila Yandi? Nzambi kusakumuna beno. Bantu yikwa ke kwikila ti ya kele Kieleka, na diboko ya munu ya kento? Beno telemisa diboko ya beno. Bantu yikwa na diboko ya munu ya bakala? Beno telemisa diboko ya beno. Nzambi kusakumuna beno. Na mutindu nyonso mu ke na kumona, muntu nyonso. Ya kele Kieleka, bankundi. Nzambi zaba ti ya kele kieleka.

<sup>125</sup> Ntangu yayi na kati ya Yandi, mpe na kuvwandaka na kati ya Yandi, beno ke na muswa na kima nyonso yina Yandi kufwaka. Mpe samu na yinki Yandi kufwaka? “Yandi kulwalaka samu na

masumu ya beto, bebaka samu na disumu ya beto ya nko; ndola ya ngemba ya beto vwandaka na zulu ya Yandi, mpe na bamputa ya Yandi beto kele ya kubeluka.” Beno me kwikila yawu? Beno me kwikila na kukatula-masumu ya Yandi samu na kubeluka ya nzutu ntangu yayi?

<sup>126</sup> Ya kele na muntu mosi ya kubela na kati ya beto? Ti ba telemisa maboko ya bawu, diboko ya bakala to diboko ya kento. Nkonga ya nene ya bantu ya kubela. Mu lenda sala ndonga ve. Beno me mona, mu vwandaka ve. . . lendaka ve kumata estrade. Ya kele na nzila ve samu na kusala yawu.

Ba ke na kuzwa balukutakanu ya bisambu kuna na bisika yankaka, samu na bantu ya kubela, na mabuundu mpe nyonso, kuna na tabernacle.

Mu ke lomba beno kima. Mikwikidi yikwa kele kuna? Beno telemisa diboko ya beno. Mbote mingi. Mu ke tangila beno Ndinga, ya kele Klisto. Lutumu ya nsuka ya Yesu na yinza, mpe na Dibuundu, na kisika, Yandi tubaka yayi, “Bidimbu yayi ke landa bayina ke kwikila; kana bawu tentika maboko ya bawu na zulu ya bambevo, bawu ke beluka.” Bantu yikwa zaba ti ya kele kieleka, Marc 16, beno tuba, “Amen.” [Dibuundu me tuba, “Amen.”—Mu.] Mbote mingi. Mu ke lomba beno mutindu mukwikidi na kutentika maboko na muntu na ntwala ya beno. Beno tentika kaka maboko na zulu ya muntu na ntwala ya beno, mpe ti mosi na mosi kusambila bisambu samu na mosi na yankaka ntangu yayi. Beno tula maboko na zulu ya muntu pene-pene ya beno.

<sup>127</sup> Mfumu, awa na ntwala ya munu kele na bwate ya bamuswale, bitende; mwa mama mosi ya kukula kele ya kulala kisika, ke na kufwa, bébé pene-pene ya lufwa, bantu ya kubela bisika nyonso. Beto ke tanga na Biblia ti ba vwanda katula na nzutu ya Paul bamuswale mpe ba-tablier, mpe ba vwandaka tula yawu na zulu ya bantu ya kubela; mpe bampeve ya yimbi, mpe bampeve ya mvindu, mpe bakubela, mpe bimbevo, vwandaka bika bantu. Ntangu yayi, Mfumu, beto zaba ti beto kele ve Santu Paul, kasi beto zaba ti Nge kele dyaka Yesu, kisika kaka ya kusambila yina Nzambi me kubika. Mpe ntangu yayi, bubu yayi, bantu yayi me funguna mutindu mosi ya lukwikilu, na kukwikilaka mutindu bantu yango salaka. Kieleka ti Nge me sala nzila samu na bawu! Mpe mu ke tula maboko ya munu na zulu ya bamuswale yayi mpe ke lomba ti bimbevo mpe bampasi kubika banzutu ya bantu na yina bayayi ke tulama na Nkumbu ya Yesu Klisto.

<sup>128</sup> Ntangu yayi, ba tubaka na beto, ti na yina Israël vwanda basika na Égypte, na nzila ya kisalu, ba vwandaka na nzila ya bawu na yinsi ya nsilulu. Mubu ya Mbwaki kangilaka bawu nzila. Mpe Nzambi vwandaka tala na yisi na nzila ya Dikunzi ya Tiya, mpe mubu vvwandaka na boma, vutukaka manima, mpe



bikaka Israël kuluta na yinsi ya nsilulu. O Nzambi, tala na yisi na nzila ya Menga ya Yesu, na nkokila yayi, mpe ti bimbevo kuvutuka manima, mpe ti ba basisa Satana. Mpe ti bantu kuluta na nsilulu yango ya mavimpi ya mbote mpe ngolo mingi, ti Nzambi tubaka, “Na zulu ya bima nyonso, Mu zola ya vwanda mbote samu na mavimpi ya beno.”

<sup>129</sup> Ntangu yayi na yina Nge ke na kumona kuna, Mfumu Yesu, maboko ya bantu yayi kuvwanda na zulu ya mosi na yankaka, ba ke na kufwanikisa lukwikilu ya bawu, yina Nge tubaka, “Bidimbu yayi ke landa bayina ke kwikila.” Ba ke na kusambilaka na mutindu ya bawu, samu na mosi na yankaka. Muntu yina ke na landa ke na kusambilaka samu na bawu.

<sup>130</sup> Ntangu yayi, Mfumu, ntembe yayi me manisa, ti Satana, tata ya kuvuna ya nene, yandi kele na muswa ve ya kusimba mwana ya Nzambi. Yandi kele muntu ya kununga. Yesu Klisto, kisika kaka ya kusambila, Nkumbu kaka ya kieleka, kunungaka yandi na Calvaire. Mpe beto ke lombi Menga ya Yandi ntangu kaka yayi, na yina Yandi nungaka konso kubela, konso kimbevo.

Mpe mu ke bokila Satana na kubika dibuundu yayi. Na Nkumbu ya Yesu Klisto, basika na bantu yayi, mpe ti ba kuma na kimpwanza.

<sup>131</sup> Bantu nyonso yina ke ndima kubeluka ya nzutu ya bawu na zulu ya lufulu ya Ndinga ya kusonama, beno pesa kimbangi ya beno telama mpe tuba, “Mu me ndima ntangu yayi kubeluka ya nzutu ya munu na Nkumbu ya Yesu Klisto.” Beno telama.

Nkembo vutuka na Nzambi! Beno bawu yayi. Beno tala mbote lweka awa, bikata mpe nyonso ke na kutelama. Nkembo vutuka na Nzambi! Kaka yina. Beno kwikila kaka. Yandi kele awa. Mutindu ya kele kitoko!

<sup>132</sup> Kuna na kati ya dibuundu, na ngaanda, na nzila ya basinga, beno zolaka mona! Mu banza muntu nyonso na kati ya awa, landila mutindu nyonso mu zaba, to mingi na kati ya bawu, ke na kutelamaka na ntangu yayi. Oh, wapi ntangu ya kitoko! Mvwandulu ya Mfumu, beno tala! “Kisika Mvwandulu ya Mfumu kele, ya kele na dipanda, ya kele na kimpwanza.” Mpeve ya Nzambi ke pesa beto kimpwanza.

<sup>133</sup> Ntangu yayi na yina Yandi me belusa beto, beto ke kwikila yawu. Yandi me vulusa beto; beto ke kwikila yawu. Bayina zola kuzwa mbotika, dilonga ya nene ya maza kele ya kukubama. Ntangu nyonso, ngunga nyonso yina beno zola kukwiza, ya ke vwanda na muntu kuna samu na kusala yawu.

Mpe ntangu yayi mu banza, ntete beto manisa, beto zolaka yimba nkunga ya ntama ya dibuundu. “Mu zola Yandi, mu zola Yandi samu ti Yandi zolaka munu ntete.” Beto telemisa maboko ya beto na Nzambi mpe beto yimba yawu na bantima ya beto nyonso!

Beto zola kukutana na beno awa na suka, na ngunga ya yivwa na ndambu, na yinzo kaka yayi, samu na dilongi *Makwela Mpe Kufwa Makwela*. Mbote mingi.

Beto yimba yawu ntangu yayi kintwadi.

Mu zola Yandi,

Ti dibuundu ya nene yayi kuyimba yawu ntangu yayi! Kuna na basinga, beno yimba yawu, mpe.

Samu Yandi zolaka munu ntete

Mpe futaka mpulusu ya munu

Na yinti ya Calvaire.

<sup>134</sup> Wapi kisika ya kusalamaka? Na yinti ya Calvaire. Na yina beto ke yimba dyaka yawu, mu zola beno pesa mbote na muntu pene-pene ya beno, beno tuba, “Nzambi kusakumuna nge, kizyeti.”

Mu . . . ( . . . ? . . . )

Samu ti Yandi ntete . . .

Mpe futaka mpulusu ya munu

Na . . .

<sup>135</sup> Oh, beno zola Yandi ve? Yandi kele kitoko ve? Yandi kele Kisika ya beno ya Kubumbama? Yandi kele Ditadi na yinsi ya kuyuma, Kiswamunu na ntangu ya mvula ya ngolo, Ntininu kaka yina mu zaba. Na yawu:

Lukwikilu ya munu ke tala na Nge,

Nge Mwana dimeme ya Calvaire,

Mvulusi ya kinzambi;

Wudikila munu na ntangu mu ke sambila,

Katula foti ya munu nyonso,

Ti kubanda bubu yayi

Mu vwanda nyonso ya Nge!

Beto telemisa maboko ya beto na yina beto ke na kuyimba yawu.

Lukwikilu ya munu ke tala na Nge,

Nge Mwana dimeme ya Calvaire,

O Mvulusi ya Kinzambi;

Wa munu na ntangu mu ke sambila,

Katula disumu ya munu nyonso,

Oh bika ti kubanda bubu yayi

Mu vwanda nyonso ya Nge!

Ti beto kulumusasa bayintu ya beto ntangu yayi na yina beto ke yimba yawu na kati ya yinwa.


Na ntangu mu ke tambula na kati ya mpimpa  
ya luzingu,

Mpe ya kuzunga na mawa,

Vwanda Ntwadisi ya munu;

Bika ti mpimpa kusoba na kilumbu,

Kusuna masa ya meso ya munu,  
Kubika ve ti mu kwenda  
Ntama na Nge.

Na yina beno ke na bayintu ya beno ya kukulumusa,  
pasteur ya beto ya luzolo, Mpangi Orman Neville, ke kangisa  
lukutakanu. 

65-0220 Kisika Ya Kusambila Ya Nzambi Me Sola  
Lukolo Parkview Junior High School  
Jeffersonville, Indiana U.S.A.

KIKONGO-KITUBA

©2021 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)